

MEJE PO CARTE PO CARTA NACOM PIA JITON TATSI TATINA, HEBREOMONAE TATINATSI

Meje yabara xua Nacom Pexanto itoroba jiwitha petacueicueijeinexatsi

1 ¹Caena bayatha Nacom itoroba pia peitorobi jume diwesi petacueicueijeji jiwichi. Barapomonae Nacom tacueicueijeichi xua poxonae tsipaebatsi wamo susato jiwi. Barapomonae matowa tacueicueijeji tsaibi xua Nacom tacueicueijeji tsaibichi matautano ainya coyeneintha tsipaeba xua Nacom tatsipaebatsi. ²Ichitha nama anoxuae matapainya barapo matakabinthe po matakabin opi dubena Nacom itorobica Pexanto wanacata cueicueijeinexa, yawa wayabara yaputaenexa Nacom. Barapon Nacom Pexantoxae tatsi caena bayatha barapo nacue forota. Matautano Nacom Pexanto caena barapoxonae cana exana xua Pexanto tatsi pecanamataxeinaenexa daxita coyeneintha. ³Nacom Pexanto tatsi pexeinya peitupanae juntu coyenein xeina po juntu coyenein Nacom xeina. Bapon Nacom Pexanto cui coyene jontatsi. Matautano bapon Nacom Pexanto tatsi pia pejume ayapusu itorobiwatha babatiya exana daxita carepaya nacuan. Nacom Pexanto tatsi nacui yabara jume weta xua Nacom Pexanto peyabara paebixae pejume diwesitha. Baxua exana poxonae naca tsitupa xua wanaca juntu coyene xanepana exanaenexa. Bapon naca capanepa abe waexanae cuiru coyenein weya. Bapoxonae bapon itaboco beicha pona penacuairetsinexa pexeinya peecaethopeibiwatha Nacom pia coxa weya tatsi xua itaboco beicha xua Nacom pia peecaethopeibiwatha tatsi beicha.

Meje yabara xua Nacom Pexanto tatsi peainya
cuin beyacaincha matatsunpiwi

⁴Nacom Pexanto ainya cui cana exana beyacaincha matatsunpiwi.
Nacom baxua tsita itapeinya xeina xua poxonae wun duta Pexanto xua po

wɔn jei: “Nacom Pexanto”, jei, po wɔn bichocono ainya cui beyacaincha matatsunpiwi pewɔn. ⁵Tsipei Nacom bapana jopa jeiyo matatsunpintha:

“Xam Taxantom, anoxuae jiwi tsita itapeinya
xeinan xua xan jinya axan”,
jopa bapana jei Nacom matatsunpintha.

Matautano bapana jopa jei matatsunpin yabara:

“Xan bapon pia paxa tatsin tsane,
bapon bara taxanto tsane”, jopa
bapana jei Nacom xua matatsunpin
peyabara paebiwatsi.
Saya ba meisa Nacom Pexantotha
yabara paeba barapo jume.

⁶Matautano poxona Pexanto itorobica po cae pin nacuamonaepiwitha tsique, pon yatsicaya compa tatsi, Pexanto yabara jei:

“Barabɔ daxita tamatatsunpiwimonae
Taxanto wɔnae jaintinchi”, jei Nacom.

⁷Nacom yabara jei matatsunpiwi:

“Tamatatsunpiwi itoroban xua nainya inta
nacuitta icha joibo ichi xua nainya pona
poxonae itoroban barapo joibo.
Barichi barapomonae itoroban xua inta
daunweya nacuitta icha nawa coicha ichi xua
daunweya taxua poxonae itoroban barapo nawa”,
jei Nacom.

⁸Ichitha nama Nacom Pexantotha jei:

“Jaina, xam ponxaem Nacom, ataya tsitecaeya
itorobiya ewatsiname xua
itorobathopequeibame jiwi.
Jinya neitorobiya ewatsi coyenewa
bara ataya pexainyei coyenewa.

⁹Xam ichichipame pocotsiwa exana
pomona xanapanaya peexanaewi.
Matautano bichocono aitafaetabim
pocotsiwa exana pomonae abe peexaneibiwi.
Daxota xan Nacom ponxaein, jinya Nacom
bichocono cajuntɔ coyene weiweina
exanatsi, beyacaincha xua jinya jiwimonae
juntɔ coyene weiweina exanan”,
jei Nacom Pexantotha.

¹⁰Equeicha Nacom Pexantotha jei:

“Xam pon pepa Necanamataxeinaem jiwi,
caena bayatha forotame barapo cae

pin nacua poxonae aena.

Jinya coya exaname peitaboco.

¹¹ Daxita baxuan pocotsiwan xua jinya
neexanaewam weraweracaena.

Tsipei daxita baxuan saya peruwan tsane,
icha be poxonae paparuwa ichi xua
peruwa tsane xua tsapatsapaca.

Ichitha xam nama ataya
tsitecaeya poponaename.

¹² Barapo cae pin nacua iru barapo itaboco
poxoru peruwa tsane pichiname xua
nexubinexa, xua pena ira equeicha
neexanaenexa yawa xua itaboco.

Barapocotsi juta coyeneya exanaename
icha be poxonae pebin ichi xua peruwa
nama xuena xua xuba, xua
penawa penamaxatatsinexa.

Ichitha xam nama ataya tsitecaeya poponame.

Matautano jinya nepoponae coyenewa
ataya jopa weraweracae tsane”,
jei Nacom Pexantotha.

¹³ Nacom bapana jopa jeiyo matatsunpintha:

“Xam tacoxa weya ecare, beya poxonae abu
caexanaeinchi xua itorobiname jinya
necaaitafaetabi jiwi”, bapana jopa jeiyo
Nacom matatsunpintha.

Saya meisa Pexantotha baxua paeba.

¹⁴ Daxita matatsunpiwi peinya pejinompaewi jiwitha. Barapo
matatsunpiwi exana dubenanaebiya pocotsiwa Nacom itoroba. Nacom
itoroba barapomonae xua petayawenaenexa tsainchi pomonaetha
pomonaexa bexa Nacom capanenebiyaena pomonaexa pejume cowuntsi
jiwixaetsi.

**Meje yabara xua poxonae naca muxuweta xua jopa bewa pepawi
cana exanaetsi Nacom pia pecapanenebiyae coyenewa tatsi**

2 ¹ Nacom Pexanto ainya cui cana exana beyacaincha matatsunpiwi.
Daxota bewa matowa itapeta jume naitaewatichi pocotsiwa bapon
yabara xua jume tainchi. Bapoxonae jopa wayabara junte-mainaponae
tsainchi po coyene xua Nacom pia pecapanenebiyae coyenewa tatsi. ² Po
peitorobi coyenein caena bayatha matatsunpiwi Nacom tacueicueijeichi,
barapo coyenein bara xainyei. Pomonaexa jopa jume cowuntsiyo barapo
peitorobi coyenein xuano xua abe exanaponano, barapomonae atene

exanaeinchi xua canacui matajupiya cana exanatsi. ³Cristo naca cana exana xua panenebiyatsi abe waexanae cuiyu coyenein weya. Cristo pia pecapanenebiyae coyenewa bichocono ainya cui coyenewa. Icha Cristo pia pecapanenebiyae coyenewa cayabara nanta xeinatsi xua pepawi xua jopa ainya cuiyiyo, waxainchi bapana jopa naca capanenebiyae tsane xua poxonae jiwi atene exanaeinchi abe peexanaexae. Barapon Cristo pon jiwi Pecanamataxeinaein barapo pecapanenebiyae coyenewa yabara tsipaeba copiya. Bapoxonae xuya barapo pecapanenebiyae coyenewa naca tsipaeba pomonae jume tane pocotsiwa xua bapon paeba pon jiwi Pecanamataxeinaein. ⁴Nacom tsita itapeinya xeina xua barapomonae bara xaniwaicha yabara paeba Nacom pia pecapanenebiyae coyenewa. Baxua exana poxonae Nacom cana exana xua barapomonae pexeinya petsita itubi coyenewan muxuna exana poxonae cueicueije. Matautano baxua exana poxonae cana exana xua barapomonae muxuna exana pocotsiwa bichocono wuna xua jiwi nabenaeca cana exanatsi. Matautano baxua exana poxonae cana exana xua barapomonae pexeinya peayapusu itorobi coyenewan muxuna cueicueije. Matautano Nacom tsita itapeinya xeina xua bara barapomonae xaniwaicha cueicueije poxonae Nacom pia Pejumope tñaxu tatsi itoroba barapomonae pia juntu coyeneintha tatsi xua pecatsibinexa po cui coyeneya peexanaenexa daxita barompaya tsiniya. Baxua exana barapo Nacom pia Pejumope tñaxu tatsi icha be pocotsi coyenewa Nacom ichichipa xua barapomonae barapo cui coyeneya exanaena.

Meje yabara xua Jesucristo be jiton coyeneya naexana

⁵Nacom jopa copatsi tsane xua matatsunpiwi canamataxeinaena barapo pena nacuatha po nacua yabara xuaunxuae pacata tinatsi. ⁶Jame nama Nacom Pejume Diwesitha ichun yabara jeye xua pomonae barapo pena nacua pecanamataxeinaewa tsane, jeye:

“Nacom xam jiwi toxeincha bichocono pin juntu coyene xeiname.

¿Eta xua metha yabara nanta xeiname jiwi xua ainya cui exaname xua pecanamataxeinaenexa tsane ichamonae?

⁷Nacom copiya saya caetotha exaname xua jiwi be conotha ainya cui.

Baxua exaname poxonae matatsunpiwi toxeinchiya ainya cui exaname beyacaincha jiwi.

Ichitha cotacaya exaname xua jiwi ainya cui naexana.

Jiwi cana exaname xua pexeinya peitupanae coicha xeina

yawa catame barapomonae peayapusu
itorobi coyenewa xua icha jiwi
pecanamataxeinaewa tsainchi.

⁸ Po jiwi cajume cowanta barapo
jiwitha catame peayapusu itorobi
coyenewa daxita xua pecanamataxeinaenexa
xuantha xua forotame”,
jei xua ichun tsipaeba Nacomtha.

Poxonae Nacom cana exana jiwi xua canamataxeinaena daxita xua
xuan forota, dapocotsi coyenewa aibi xua jiwi jopa itacupaetsi xua
pecanamataxeinaewa. Daichitha awiya cataunxuae jopa jiwi cui taetsi
xua daxita pecanamataxeinaewa. ⁹Ichitha waxainchi Jesús yaputainchi
pontha pon Nacom saya caetho cana exana xua jopa ainya cuiyo.
Matatsunpiwi conotha ainya cui beyacaincha xua Jesús xua poxonae
caetho cana exanatsi xua jopa ainya cuiyo xua poxonae popona be
jiton. Nacom bichocono peantobexae daxita jiwi daxota bapon copata
xua Cristo tsitupaena daxita jiwi abe pia peexanaexae. Anoxuae
equeicha Nacom ainya cui cana exana xua Jesús ainya cui cana exanatsi.
Matautano Nacom cana exana xua Jesús jopa juniya ainya cuiyiyo xua
jiwi itorobiya peewatsiwatsi. Matautano Nacom Jesús catatsi pexeinya
peitupanae coicha. Nacom baxua exana xua Jesús pia petsitupaexae jiwi.

¹⁰Nacom forota daxita coyenein. Matautano daxita baxuan Nacom
nata exana. Matautano Nacom ichichipa xua daxita piamonae tatsi
pexeinaewa tsane pia pexeinya peitupanae coicha tatsi peponaenexa
tsane pia nacuatheicha tatsi. Daxota Nacom tsita xanepanatsi xua
poxonae Jesucristo atene exanatsi beta yatsicaewa pejuntu coyene
wunaetsinexatsi xua jiwi pecanamataxeinaenexatsi Nacom pia
nacuatheicha. Baxua Nacom exana poxonae Jesucristo atene exanatsi
poxonae tsitupa xua jiwi pecapanenebiyaenexatsi abe pia peexanae cuiru
coyenein weya tatsi. ¹¹Tsipei daxita pomonae juntu coyene xanepana
exanatsi Nacomtha, iruru Jesús pon cana exana baxua barapomonaetha,
daxita barapomonae nantauta caein Paxa pon Nacom. Daxota Nacom
Pexanto tatsi jopa auriyo poxonae naca yabara jei: “Tayapin jiwi pam”,
poxonae jei. ¹²Nacom Pexanto tatsi pon Jesucristo, caena bayatha
Nacom Pejume Diwesitha xua salmos penaxunaeweixi diwesintha jeye
Nacomtha:

“Cayabara paebinchi tayapinmonae jiwitha.
Cata naxunaeinchi pewei xua wuna
tacajainchinexa poxonae nanabarū
nanacaetutsin jinya botha pomonae cajume
cowanta”, jei Jesucristo Nacomtha.

¹³Ichacuitha caena bayatha Jesucristo jeye xua Isaías pia diborotha:

“Xan jume cowũntsiya wũnae ewatsin
Nacom xua tana neyawenaewa”, jei.

Equeicha Jesucristo jeye:

“Xote ecan, barũ ecan tapexui pomonae tana
nejume cowũntsiwi pomonae Nacom
necata”, jei Jesucristo.

¹⁴Pexui ba bara xeina pejana yawa pewito icha be coxiyeiwi ichi tsipei jiwixae. Barichi Jesús xeina jiton pia pepon tatsi pexeinaexae jiwi pia pewito tatsi xuano xua jiwi pia pejana tatsi. Jesús baxua xeina xua petsitũpaenexa jiwi. Daxota itacũpatsi xua peamanayabiwa pontha pon xua peyapusũ itorobi coyenewa xeina xua jiwi pejutebiwatsi. Bapon apara pon caurimonae pia pentacaponaein tatsi. ¹⁵Jesús baxua nacata exana wanaca capanenebiyaenexa wajunuwi coyene weya xua poxonae yabara junuwatsi xua wawerapaewa tsane. Jiwi daxita matacabin junuwiya jinompeiba xua pewerapaewayainwa. ¹⁶Bara xaniyei Jesús jopa tsipatopeicaeyo xua peyawenaenexa tsane matatsunpiwi. Apra jame Jesús tsipatopeica peyawenaenexa tsane Abraham pia pemomoxi susato jiwi tatsi xua yatsicaewa jiwi. ¹⁷Daxota Jesús poxonae naexana bewa yawa naexanaena daxita coyeneya icha jiwi pia pepon tatsi ichi. Bapon bewa baxua yawa naexanaena pia penaexanaenexa pepa wasacerdotepin pocotsin nacata paebeiba Nacom beicha. Matautano bapon Jesús pon pepa wasacerdotepin xainyeya taexana po coyene xua ba sacerdotemonae pia petaexanae coyenewa xua Nacom tsita exanatsi. Bapon Jesús naca weyatane xua wanaca yawenaenexa, xua jiwi petsitũpaenexatsi xua Nacom jiwi pejũntũ coyene yabara jũntemainenexa tsaibi tsainchi abe pia peexanae cuiru coyenein tatsi. ¹⁸Jesús atene exanatsi poxonae caurimonae pia pentacaponaein tatsi jũntũ coyene jujũtatsi petanenexa tsainchi icha abe exana. Daxota anoxuae bapon Jesús itacũpatsi xua peyawenaewa pomonaetha pomonae irũrũ jũntũ coyene jujũtatsi caurimonae xua abe peexanaewa tsane.

Meje yabara xua Jesús peainya cuin beyacaincha Moisés

3 ¹Nacom irũ paca wũn duba poxonae itapeta pomonae pepatsinexa tsane pia nacuatheicha tatsi. Tamonae pam, paxam jiwana pam pomonae pejume cowũntsiwi Jesucristo, pomonae pam Nacom paca jũntũ coyene xanepana exana xua piamonae tatsi painya paca cana exanaenexa. Daxota Cristo Jesús pacayabara nanta xeinare. Bapon Jesús Nacom pia peitorobin tatsi pon naca tsipaeba Nacom nexa. Matautano bapon wapepa sacerdotepin pon wanacata paebeibin Nacom beicha. Bapon payabara cueicueijan ichamonaetha wajume cowũntsixae bapon. ²Jesús bara xainyeya exana Nacom pia petanacuichiwa tatsi Nacom peyabara tsiwũnae muxu dutsixae bapon barapo penacuichiwanexa

xua Nacom pia peitorobin tatsi tsane yawa wapepa sacerdotepin tsane. Jesús beta xainyeya taexana, icha matha Moisés ichi xua poxonae daxita coyene beta xainyeya taexana Nacom piamonaetha xua Nacom nexa. ³Jesús pecapanepaexae jiwi bewa bichocono toxeincha barũ cui itara jinaetsi bapon beyacaincha xua barũ cui itara jinatsi Moisés. Barapocotsi juta coyeneya ichi, bewa Jesús cana exanaetsi icha be poxonae jiton ichi xua bewa barũ cui itura jinaeinchi xua ainya cui exanatsi peacabixae bo beyacaincha xua bo xua ainya cui tsuncuae. ⁴Daxita ba bon tsoponae poxoru apara jiton peexanaexae. Ichitha jame pon yatsicaewa nama daxita coyenewan exana apara bapon Nacom. ⁵Bayatha Moisés apara pon petanacuichinchi Nacom. Bapon xainyeya daxita exana Nacom pia botha pocotsiwa Nacom itoroba. Bapon Moisés pia penacuichiwa tatsi saya xua yabara tsiwũnae caunuta pocotsiwan xua bexa Nacom exanaena. ⁶Ichitha nama Cristo Nacom Pexantoxae tatsi xainyeya daxita exana Nacom nexa tsipei cana exana xua bapon canamataxeina daxita pomonae Nacom piamonae tatsi. Waxainchi Nacom piamonaetsi icha ajuntũyarusũya jume cowũntapoinchi Cristo beya xua poxonae tũpaeinchi. Mataũtano waxainchi Nacom piamonaetsi icha jũntũ coyene weiweinaya wũnae ewatatsi pocotsiwa bexa Nacom wanaca tsixanaewa tsane.

Meje yabara xua nafifina caewata Nacom piamonae tatsi

⁷Cristo ainya cui peexanaexaetsi beyacaincha xua Moisés ainya cui exanatsi daxota Nacom pia Pejumoŕe tũnaxũ tatsi naca itoroba xua bewa jume taetsi Cristo. Baxua paeba Nacom pia Pejumoŕe tũnaxũ tatsi. Nacom Pejume Diwesitha, jeye:

“Anoxuae pana nejume taema pocotsiwa paca tsipaebatsi ponxaein Nacomxaein.

⁸Painya xoba pana nejumefebame painya jũntũ coyenewatha xua daxota jopa painya tana nejume cowũntsiwam.

Jopa bara paichinde icha pomonae ichi xua poxonae bayatha nejume matawenta xua exanan poxonae jinompa ichaxota ira xuepana susato tsurucuae nacuatha. Barapomonae nefayacoteiba poxonae nejũntũ coyene jũjuteiba beya poxonae anaepanan barapomonaetha poxonae jopa xapain exaneibiyo.

⁹Barapomonae pomonae nejũntũ coyene jũjũta, apara painya amo susato jiwi. Barapomonae baxua inta exana poxonae jopa nejume cowũntsiyo.

Baxua exaneiba beya poxonae cuarenta po weibe tsuxubi bequein taiba pocotsiwa xua taexaneiban barapomonae xua beya cuarenta po weibetha.

¹⁰ Daxota barapomonae caseban yawa yabara jan barapomonae: ‘Barapomonae jopa benejume cowuntsiyo pejuntũ coyeneintha yawa jopa beyaputaeyo pocotsiwa ichichipan taexanan barapomonae’, jan.

¹¹ Barapomonae caseban.
Tacoutha jume daunweya najan:
‘Barapomonae bapana jopa patsi tsane tanacuatha ichaxota po nacuatheicha nafinacaewatsina pomonae tana nejume cowuntsiwi’, najan”, jei Nacom pia Pejumope tũnaxũ tatsi,
Nacom Pejume Diwesitha.

¹² Tamonae pam, pomonae irũ painya nejume cowuntsi jiwixae Jesucristo. Painya xoba paxeiname po jũntũ coyene bichocono abe, po jũntũ coyene jopa ichipaeyo xua pejume cowuntsiwa Nacom, pon xua asũ popona. ¹³ Jame maisa daxita matacabin nantiya pana najũntũ coyene tsacabare xua ajũntũyapusũya painya nejinompaewa tsane. Daxita pam baxua paexande anoxuae poxonae cataunxuae po dapaetha anoxuae petain paca itacũpa xua paexaname baxua. Matautano baxua paexande xua jopa pata tana nejumefebiwam painya jũntũ coyenewatha. Icha pana nejumefebame painya coutha pana namuxujainyabichipame xua daxota abe painya neexanaewa tsane. ¹⁴ Bewa xanepanaya ayapusũya jume cowũnta dubenanaebiyaeinchi Nacom xua beya poxonae tũpaeinchi. Icha baxua betiya ayapusũya jume cowũnta dubenanaebiyaeinchi icha ichichi poxonae aena jume cowũntatsi, bapoxonae nayawa muxuna xeinaeinchi Nacom pia nacuatheicha pocotsiwa Cristo xeina.

¹⁵ Daxota equeicha paca tsipaebatsi xuaunxuae po diwesi paca tsipaebatsi xua Nacom Pia Pejumope tũnaxũ tatsi cueicueije, jeye:

“Anoxuae pana nejume taema pocotsiwa paca tsipaebatsi, ponxaein Nacomxaein.
Icha pana nejume taneme bapoxonae painya xoba pana nejumefebame painya jũntũ coyenewatha xua daxota jopa pata tana nejume cowuntsiwam tsane.
Jopa bara paichinde icha pomonae ichi xua poxonae nejume matawenta poxonae jinompa ichaxota ira xuepana susato tsurucuae nacuatha”,

jei Nacom pia Pejumope tñaxu tatsi.

¹⁶Payabara nanta xeinare pomonae jume tane xua Nacom pejume tatsi xua bapoxonae Nacom jume matawentatsi. Daxita bapomonae apara pomonae Moisés mata cawarapa Egipto nacua weya. ¹⁷Payabara nanta xeinare Nacom xua caseba xua beya cuarenta po weibetha tsuxubi. Bapomonae apara israelmonae pomonae xua abe exana poxonae jinompa ichaxota ira xuepana susato tsurucuae nacua beya, xuano xua baxota werapano. ¹⁸Payabara nanta xeinare pomonae Nacom daunweya yabara paeba, xua jei: “Barapomonae bapana jopa patsi tsane tanacuatha ichaxota po nacuatheicha nafifinacaewatsina pomonae tana nejume cowuntsiwi”, jei. Bapomonae apara israelmonae pomonae xua jopa exanaeyo pocotsiwa Nacom itoroba. ¹⁹Bara yaputainchi xua barapomonae jopa itacupaetsi xua pepatsiwa Nacom pia nacuatheicha tsipei jopa Nacom jume cowuntsichi.

4 ¹Waxainchi yabara jume cowunta dubenanaebiyatsi xua Nacom naca tsiwuna muxu duta. Nacom naca tsiwuna muxu duta xua bara wanaca itacupaewa tsane xua wapatsiwa pia nacuatheicha po nacua xua Nacom pia penafifinacaewatsi nacua. Daxota poxonae cataunxuae naca itacupa xua wapatsiwa tsane barapo nacuatheicha bewa yabara najuntu coyene exabichi xua paxam jiwana jopa itacupaetsipaetsi xua pepatopaewa Nacom pia nacuatheicha. ²Waxainchi barichichi jume tainchi barapo Nacom pia pecapanenebiyae diwesi, icha bayatha barapomonae ichi xua jume tane barapo diwesi. Ichitha barapo diwesi jopa yawenaetsi barapomonae xua pejume cowuntsinexa Nacom, tsipei jopa jume cowuntsiyo barapo diwesi. ³Waxainchi nama barapomonaetsi xua wajume cowuntsiwi barapo pecapanenebiyae diwesi. Daxota naca itacupa xua wapatsiwa Nacom pia nacuatheicha ichaxota bapon naca baru nafifinacaewatsina baxoteicha. Nacom wamo susato jiji yabara paebatsi xuaunxuae paca tsipaebatsi. Jeye:

“Barapomonae caseban.

Tacoutha jume daunweya najan:

‘Barapomonae bapana jopa patsi tsane tanacuatha ichaxota po nacuatheicha nafifinacaewatsina pomonae tana nejume cowuntsiwi’, najan”,

jei Nacom Pia Pejumope tñaxu tatsi.

Bequein baxua Nacom paeba ichitha caena bayatha weta barapo nacua ichaxota jiji nafifinacaewatsina poxonae nacobe weta xua daxita forota barapo cae pin nacuathe. ⁴Po matacabi pewun “siete matacabi”, jei, barapo matacabi Nacom Pejume Diwesitha yabara paeba. Bapon jeye:

“Nacom nacuita seis po matacabibe.

Bapoxonae nafifinacaeca po mataqueitha

pewun ‘siete matakabi’, jei”,
 jei Nacom Pejume Diwesitha.

⁵Equeicha Nacom Pejume Diwesitha jeye:

“Barapomonaē bapana jopa patsi tsane tanacuatha
 ichaxota po nacuatheicha nafifinacaewatsina
 pomonaē tana nejume cowuntsiwi”, jei Nacom.

⁶Ichitha cataunxuae acoibi ichamonae pomonaē xua bexa tsane Nacom copatsina xua nafifinacaewatsina ichaxota bapon nafifinacaewata. Barapomonaē jume cowuntsina xua Nacom paeba. Pomonaē copiya bequein jume taetha Nacom pia pecapanenebiyae jume barapomonaē Nacom caena bayatha jopa copatsiyo xua barapomonaē nafifinacaewata tsipei jopa jume cowuntsiyo pocotsiwa Nacom paeba. ⁷Daxota Nacom nanta xeina xua equeicha pena matakabi exana. Barapo matakabi xua wun duta “anoxuae” jei xua pena coyene. Barapo matakabitha xua piamonaē tatsi petaitacupaewatsi tsainchi xua nafifinacaewatsina. Baxua Nacom exana caena bayatha poxonaē David popona xua ainya wei pirapae poxonaē jinompa pomonaē jopa copatsichi xua nafifinacaewata. Anoxuae Nacom bapocotsiwa naca tsipaeba pocotsiwa bayatha tsipaeba piamonaē jiwitha, poxonaē David popona, pon jeye:

“Icha anoxuae pajume naitaewatame
 pocotsiwa Nacom paca tsipaeba jopa
 pajumefebinde painya juntu coyenewatha
 xua daxota jopa Nacom painya nejume
 cowuntsiwam”, jei David caena
 bayatha Nacom nexa.

⁸Josué caena bayatha wamo susato jiwi matakapoinchi Canaán nacua berena pomonaē Israel piamonaexae tatsi. Apara jopa matakaponaeyo ichaxota po nacua Nacom yabara paeba xua barapomonaē nafifinacaewatsina. Icha Josué bayatha matakaponaetsipa barapomonaē barapo nacuatheicha bapoxonaē Nacom jopa nantawenonaetsipae xua exanaena icha matakabi po matakabitha poxonaē barapomonaē itacupatsi xua pepatsiwa tsane barapo nacuatheicha, po nacua ichaxota Nacom yabara paeba. ⁹Daxota cataunxuae awiya barapo matakabi tsoponae po matakabitha poxonaē Nacom piamonaē tatsi nafifinacaewatsina Nacom pia nacuatheicha. ¹⁰Tsipei pon weta pia penacuichiwa pocotsiwa Nacom itoroba bara itacupatsi xua nafifinacaewata ichaxota Nacom nafifinacaewata. Bapon baxua exanaena icha Nacom ichi poxonaē nafifinacaeca, poxonaē nacobe weta pia penacuichiwa xua poxonaē forota daxitan. ¹¹Daxota bewa ajuntusuya jume cowunta dubenanaebiyaeinchi xua wanafifinacaewatsinexa tsane ichaxota Nacom nafifinacaewata. Baxua exanaeinchi xua ichamonae waxainchi jiwantsi jopa peyaseicaewa tsane xua nafifinacaewata. Waxainchi jopa ichipaetsi

xua icha ichamonae ichi xua jopa naffinacaewatsiyo jopa pejume cowuntsixae pocotsiwa Nacom paeba.

¹²Nacom Pejume Diwesi peajuntuyapusu diwesi xuano peayapusu itorobi coyene xeina. Barapo Nacom Pejume Diwesi barapocotsi juta coyeneya ichi xua icha ba cusi ichi xua po wato nantiya baru ducuabe. Barapo cusi tajü uncuiya pebarüwa xua pepontha. Barapoxonae barapo cusi itapeinya xeina daxita pocotsiwan xeina wan iya xua matha iya dubeinya bupaniya. Ichitha Nacom Pejume Diwesi ayapusu beyacaincha cusi tsipei barapo Nacom Pejume Diwesi itacupatsi tajü bereca pona wajüntu coyenewatha ichaxota nanta xeinatsi. Barapo diwesi naca yaputane exana po coyenein xua wajüntu coyenewatha xeinatsi. Naca yaputane exanano po coyenein yabara nanta xeinatsi wajüntu coyeneintha. ¹³Dapocotsiwan aibi barapo cae pin nacuathe xua Nacom forota pocotsiwan xua xuan nantiyatarubena Nacom peitabaratha pocotsiwan xua bapon jopa taeyo. Daxitan naitutarubena xuano xua Nacom itacupatsi xua beta petaewa daxita coyenein. Nacomtha bexa yabara tsipaebinchi xua pocotsiwan bayatha exainchi.

Meje yabara xua Jesús pepa sacerdotepin

¹⁴Jesús apara Nacom Pexanto tatsi. Bapon wasacerdotepin, pon pepa sacerdotepin, pon bichocono yatsicaya peainya cuin. Bapon bayatha patopa Nacom peitabaratheicha tatsi. Daxota bewa ajuntuyapusüya jume cowunta dubenanaebiyaetsi bapon, pon yabara cueicueijeichi ichamonaetha. ¹⁵Barapo wasacerdotepin pon pepa sacerdotepin, naca weyatane xua wanaca yawenaenexa poxonae juntu coyene faefaenoneibatsi abe waexanaexae. Bapon baxua nacata exana, tsipei bapon barichichi juntu coyene jujutatsi xua abe peexanaenexa. Caurimonae pia pentacaponaein tatsi juntu coyene jujuta icha naca ichi. Daichitha nama bapon Jesús bapana jopa abe exanae. ¹⁶Daxota bewa ajuntuyapusüya wücaetsi Nacom pon bichocono naca antobe. Jopa bewa junuwi tsainchi xua wacueicueijeija Nacomtha. Bapoxonae Nacom naca weyataena wanaca yabara jütemainenexa xua abe waexanae cuiru coyenein. Matautano bapon wanaca antobexae naca yawenaena poxonae po matabitha canantawenoneibatsi, poxonae naca juntu coyene jujuta.

5 ¹Jiwi ba barompaya pia xantha tatsi jiwana taitapetsi pomonae xua daxita cana exanatsi pepa sacerdotepiwi. Barapo sacerdotepiwi itorobatsi xua barapo sacerdotepiwi caunuta jiwi yabara poxonae cueicueijejei Nacom peitabaratha xua jiwi nexa. Matautano barapo sacerdotepiwi yabara tsiwün dubatsi po coyene jiwi petaexaneibiwa tsainchi Nacomtha pocotsiwan xua jiwi amanaya pecatsiwa Nacomtha abe peexanaexae. Matautano barapo sacerdotepiwi yabara tsiwün dubatsi po coyene xua jiwi petaexaneibiwa tsaibi tsainchi xua poxonae

duwei pejutebiwa pocotsi duwein xua jiwi amanaya pecatsiwa Nacomtha abe peexanaexae. ²Barapo sacerdotepiwi ichacuitha jüntu coyene faefaenouneiba, poxonae jüntu coyene jujuteibatsi caurimonae pia pentacaponaein tatsi xua abe peexanaenexa. Tsipei barapomonae nacui yaputane xua poxonae jüntu coyene jujuteibatsi, daxota bara itacupatsi xua peyawenaewa ichamonaetha. Itacupatsi xua peyawenaewa pomonaetha pomonae abe peexanaewi xua bequein jopa yaputaeyo xua abe exana, iruru pomonae yatsicaewa nacui yaputane xua abe exana. ³Barapo sacerdotepiwi iruru abe exaneiba xua pejuntu coyene faefaenaexae poxonae jüntu coyene jujuteibatsi caurimonae pia pentacaponaein tatsi. Daxota bewa iruru pia coutha nata exanae po coyene xua duwei penata tautsinexa Nacom nexa icha poxonae jiwi tacana ichichi poxonae abe peexanaexae. ⁴Dapon ajibi xua pia coutha naexana pon pepa sacerdotepin. Jame ba Nacom bapocotsin yabara tsiwun duta xua penaexanaenexa pepa sacerdotepin. Matautano bapontha Nacom cata barapo peainya cui yabara matawun dutsiwa icha bayatha Nacom cana ichi pon pewun Aarón pon copiya pepa sacerdotepin naexana. ⁵Cristo bara cana ichichi. Bapon Cristo pia coutha jopa naexanaeyo pon pepa sacerdotepin xua peainya cuin penaexanaenexa. Apra jame Nacom cata barapo peainya cui yabara matawun dutsiwa xua pepa sacerdotepin penaexanaenexa. Bayatha Nacom yabara paeba Pexanto pejume diwesitha, barapo peainya cui yabara matawun dutsiwa xua penaexanaenexa pepa sacerdotepin, xua jeye:

“Xam apra taxantom.

Anoxuae xan jinya axaxaein.

Yabara catsiwan dutatsi barapo jinya
nenacuichiwanexa”, jei Nacom.

⁶Equeicha Nacom Pejume Diwesitha xua Pexanto yabara paeba, jeye:

“Xam pon sacerdotepim, xua bara ataya
tsitecaeya tsane, icha Melquisedec matha
ichi pon caena bayatha popona.

Bapon pepa sacerdotepin naexana xua
ataya tsitecaeya pepoponaein”,
jei Nacom.

⁷Poxonae cataunxuae Cristo popona po cae pin nacuathe bichocono jume daunweya tsipaibeiba Nacomtha xuano jume daunweya wuqueibano beya poxonae bichocono wecoyei. Cristo wuqueiba Nacomtha, pon bequein itacupatsi xua Cristo peyawenaewatsi xua jopa petupaewa. Mexeya poxoru bapon itapetsiya peexanaexae pocotsiwa Nacom ichichipa daxota bara Nacom jume tane pocotsiwa Cristo wuca. ⁸Bequein Cristo Nacom Pexanto tatsi, ichitha nacuiduba xua Paxa jume jejei xua exana pocotsiwa Paxa itorobatsi xua poxonae atene exanatsi xua ichamonae

exana. ⁹Bapon pia coutha daxita najuntũ cui yabara wũnaeta poxonae atene xua penaexanaenexa pepa sacerdotepin. Daxota bapon Cristo exana xua jiwi capanenebiyatsi abe pia peexanae cuiru coyenein weya xua ataya tsitecaeya tsane daxita pomonaе pia pejume cowũntsiwichixaetsi. ¹⁰Nacom yabara tsiwũn duta xua Cristo pepa sacerdotepin naexana, icha matha Melquisedec ichichi xua yabara tsiwũn dutatsi xua pepa sacerdotepin naexana, pon caena bayatha popona.

Meje yabara xua poxonaе muxuwetatsi pomonaе Nacom pejume cowũntsiwi xua pebarapentsiyainwa po coyene xua pejume cowũntsiwa Nacom

¹¹Waxainchi xeinatsi nawita xua po coyene wayabara natsipaebinxе Cristo xuaunxuae anoxuae paca tsipaebatsi. Daichitha bichocono ayapube xua paca yaputane exainchi tsipei painya coutha jopa pana nayabara copatsim xua bara painya neyabara yaputaewa tsane baxuan. ¹²Caena bayatha bewa pana naexanaem pomonaе jiwi painya necuidubi jiwi pam. Daichitha cataunxuae panantawenoname xua ichamonae equeicha caewa yabara paca cuiduba Nacom Pejume Diwesi pocotsiwan xua jiwi nantawenona copiya nacuiduba poxonaе aena jume cowũnta. Paxam pomonaе equeicha caewa pajuntũ coyene faefaename, xua painya nejume cowũntsiwa. Barapo coyene icha be poxonaе pexui ichi xua nantawenona mito, jopa peitacũpaexaetsi xua pexaewa pewito. ¹³Pexui poxi isainatsi ba nantawenona mito poxoru pewito jopa xaeyo. Barapocotsi jũta coyeneya paichim. Paxam jopa paca itacũpaeyo xua painya neyabara yaputaewa Cristo pia pecuidubiwa xua po coyene xanepanaya painya nejinompaewa. ¹⁴Nama pewi jopa apara pexui nexiyo poxi isainatsi, jame apara ba pomonaе pinyon nexa. Barapocotsi jũta coyeneya ichi pomonaе ba xaniwaicha jume cowũnta pia juntũ coyeneintha barapomonaе jopa abe exanaeyo. Barapomonaе nacuiduba xua yabara yaputane po coyene abe yawano po coyene wũnae.

6 ¹Barabũ nacui barapentatsi xua nayabara cueicueijeichi pocotsi coyenein xua copiya naca cuiduba xua Cristo yabara poxonaе aena jume cowũntatsi. Jame barabũ nanta xeinatsi, po coyene pepa pena coyene icha pomonaе pinyon ichi xua pocotsiwan nanta xaina pomonaе beta jume cowũnta. Po coyenein xua bayatha copiya naca cuiduba xua Cristo yabara, jopa nantawenonaetsi xua equeicha wanacuidubiwatsi po coyenein xua abe waexanaexae bewa aura tsainchi xua daxota nacui barapentatsi po coyenein abe, po coyenein xua ba naca wepu tsana exana Nacom weya. Matautano jopa nantawenonaetsi xua jume cowũntsinchi Nacom. ²Barapocotsiwanje jopa nantawenonaetsi xua equeicha caewa nayabara cueicueijeichi tsainchi tsipei bayatha payaputaneme. Matautano jopa equeicha nantawenonaetsi xua caewa nayabara cueicueijei tsainchi xua bewa bautisabinchi. Matautano jopa nantawenonaetsi xua equeicha caewa nayabara cueicueijei tsainchi xua poxonaе Nacom pejume

cowantsiwi pecobetha pemataboco jayabiwatsi xua pexeinaenexa pejuntũ cui coyenein po pejuntũ coyene Nacom pia Pejumope tũnaxũ tatsi cata. Matautano jopa nantawenonaetsi xua equeicha caewa nayabara cueicueijeji tsainchi xua equeicha jiwi asũ peexanaewatsi petũpae cuiru coyene weya. Barichi jopa nantawenonaetsi xua equeicha caewa nayabara cueicueijeji tsainchi xua poxonae Nacom yabara paebina jiwi xua penatsicuentisiwa xua abe peexanaexae Nacomtha. Barapoxonae Nacom itawetsina xua bara ataya tsitecaeya tsane abe peexanaexae. ³Jame barabũ nayabara cueicueijeji tsoponae tsainchi icha coyenein xua pena coyene icha Nacom bara naca cui yabara copatsina.

⁴Ichamonae penta xua Cristo pejume cowantsiwatsi. Daxota jopa neyapucũpæyo xua equeicha tacuidubiwa Nacom Pejume Diwesi barapomonaetha. Barapomona Nacom pia pejume xainyeiwa nacuiduba, xuano yaputane Cristo pon Nacom itoroba po cae pin nacuathe tsique. Matautano barapomona xaina po pejuntũ coyenein Nacom pia Pejumope tũnaxũ tatsi cata. ⁵Matautano barapomona yabara jume cui jũjũta Nacom Pejume Diwesi xua daxota yaputane xua barapo diwesi bara xanepana. Matautano barapomona tane po peyapusũ itorobi coyenewa Nacom pia Pejumope tũnaxũ tatsi cata jiwitha xua barapo jiwi barapo coyenewatha exana pexeinya petsita itubi coyenewan beya poxonae Cristo equeicha patopaena. ⁶Icha daxita barapo coyenein barapomona equeicha nacui barapenta xua jopa Nacom pejume cowantsixaetsi, bapoxonae nama jopa itacũpaetsi xua equeicha caewa pejume cowantsiwa Nacom. Poxonae Nacom equeicha pentatsi baxua be barapomona equeicha Jesús caewa bexotsi naetha. Barapomona exana xua jiwi Nacom Pexanto tatsi yabara jume cui caponatsi tsipei jopa Nacom jume cowantsichi. Baxua icha be poxonae ichamonae ichi poxonae matha Jesús naetha bexotsi xua daxota daxita jiwi Jesús cui caponatsi. ⁷Pabi ba po iratha ema mũ joneca poxonae ema duneiba barapo iratha, barapo pabitha jiwi pexaewa ũba. Nacom exana barapo iratha xua pexaewa xaniwaicha taxainwaetsina xua pomona peubimona taxainwaetatsi. ⁸Ichitha icha icha pabi saya Ʃ pesoiwana xuwa, barapo pabi jopa wũnaeyo poxoru jiwi jopa yawenaetsi poxonae ũba barapo pabitha. Daxota Nacom exana xua barapo pabi jiwi tautsina xua pesoiwana daxita tũpa peexanaenexa. Icha Nacom cana ichi pabintha bara jũta cana ichiya exana jiwitha. Icha jiwi Nacom jume cowanta dubenanaebiya, bara Nacom beta exanaena barapo jiwi. Ichitha icha barapo jiwi Nacom pentatsi, Nacom jopa yawenae tsane barapo jiwi. Saya jame Nacom itoroba xua barapo jiwi petautsiwa tsainchi po isototha xua bapana jopa itacounayiyo.

**Meje yabara xua wawũnae ewatsiwa xua pocotsiwa
Nacom yabara wanaca tsiwũnae muxu dutsiwa**

⁹Tamonae pam, paxam pomona tapaca caantobe jiwichi pam. Bequein baxuan yabara paca tsipaebatsi, xua jiwi petautsiwatsi ichitha

paca yabara yaputainchi xua jopa papentsim Nacom. Yaputan xua bara beta paexaname Nacom painya nepaca capanenebiyaexae. ¹⁰Tsipei Nacom bara xainyeya exana. Nacom jopa paca yabara jüntemainae tsane pocotsiwan xua bayatha paexaname. Mataütano jopa paca yabara jüntemainae tsane xua ichamonae painya neyawenaewa pomonae iru pejume cowuntsiwi Nacom. Baxua patsita itapeinya xeiname xua painya neantobexae Nacom. Baxuan caena bayatha paexanaponame, awiya cataunxuae baxuan paexanaponame. ¹¹Bequein baxua paexaname daichitha paichichipan xua daxita paxam awiya payawenaponaename ichamonae. Ajüntuyapusüya pawünae ewataponare pocotsiwa Nacom yabara paca tsiwünae muxu duta xua beya payacuiya werapaeya othopaename. ¹²Jopa paichichipaeinyo xua payabara ajüntucoyenefaetabim xua pawünae ewatame baxua tsipei jopa pana nayabara copatsim xua painya neyabara yaputaewa tsane baxua. Jame maisa bara jütiya paichiponaeinde, icha ichamonae ichi xua poxonae bichocono jume cowünta Nacom. Mataütano barapomonae jopa bepijawa aitaconaeyo xua wünae ewata pocotsiwa Nacom yabara tsiwünae muxu duta.

¹³Poxonae Nacom yabara tsiwünae muxu duta Abrahamtha, Nacom pia wünthä yabara tsiwünae muxu duta Abrahamtha. Baxua Nacom pia wünthä paeba tsipei dapon aibi pon bichocono ainya cui xua beyacaincha Nacom. Nacom ataya jume xainyei paeba daxota Nacom jopa icha wünthä paebiyö. ¹⁴Nacom jeye Abrahamtha: “Bara xaniwaicha bichocono cayawenaeinchi. Jinya nemomoxi jiwi pia pemomoxi susato jiwi tatsi pinmonae exanaein”, jei Nacom. ¹⁵Abraham abü saya beitatemaya wünae ewatapona pocotsiwa Nacom yabara tsiwünae muxu duta, jopa aitaconaeyo. Bapoxonae pirapae Abraham catatsi pocotsiwa Nacom bayatha yabara tsiwünae muxu duta bapontha. ¹⁶Poxonae jiwi ba yabara natsiwünae muxu duta xua pocotsiwa bepa pinae exaneibina, pewünthä paeba, po wän xua ichün pewün tatsi pon xua bichocono ainya cui beyacaincha xua barapomonae. Barapomonae baxua exana xua ichamonae peyaputaenexa xua bara xaniwaicha xainyeya peexaneibinexa pocotsiwa xua penayabara tsiwünae muxu dubeibixae. Bapoxonae ichamonae jopa itacüpaetsi xua baxua yabara jume matsontsonoba barapomonaetha. ¹⁷Nacom ichichipa xua tsita itapeinya xeina piamonaetha, pomonaetha pomonae pecatsixae tsane pia petsiwünae muxu dutsiwa xua jopa equeicha ichawa nanta xeinae tsane xua pocotsiwa exanaena. Nacom ichichipa xua barapomonae peyaputaewa tsane xua bapon xaniwaicha exanaena pocotsiwa bayatha yabara tsiwünae muxu duta Abrahamtha. Daxota Nacom yabara tsiwünae muxu duta pia wünthä. ¹⁸Ainya coyenewabe Nacom exana po coyenewabe xua jopa itacüpaetsi xua ichawa yabara jume toxeinchiya

exana. Meje baxue: Icha coyenewa Nacom yabara tsiwunaē muxu duta; icha coyenewano xua Nacom pia wuntha yabara paeba xua pocotsiwa exanaena. Nacom jopa itacupaetsi xua peyabara naerabiwa barapo naxobe coyenebe. Waxainchi pomonaetsi xua pentatsi po coyenein barapo nacue pia coyenein, po coyenein xua abe exanatsi naca cana exana. Matautano jume cowuntsiya wunaē ewatatsi xua Nacom wanaca yawenaewa tsane xua naca capanenebiya abe waexanae coyenewa weya. Barapocotsiwa bayatha naca yabara tsiwunaē muxu duta. ¹⁹Waxainchi wunaē ewatatsi xua Nacom bexa naca capanenebiya tsane. Wajume cowuntsixae baxua daxota naca juntu coyene ayapusu exana. Naca itacupa xua wayabara jume cowuntsiwa. Wawunaē ewatsixae baxua naca yawena xua beta jinompatsi Nacom nexa. Baraxua icha be poxonaē jera ichi xua tuwuntha babatabaruta pocotsiwa xua xota bichocono arewe xua jera beta perucuaenexa. Tsipei xaniwaicha wunaē ewatatsi pocotsiwa Nacom exanapaeba, baxua naca cana exana xua nacaewabatsi Nacomtha xua caemonae nanaexanatsi bapontha. Nacom itaboco beequiya, paparuwa peuma werena pia botha eca xua tututhiya xua pin botha ichaxota wapatsiwa tsane. ²⁰Jesús itaboco beicha naca tsiwunaē patopiya Nacom pexainya beicha tatsi. Bapon copiya bewa bara bepatopiyaena xua wanaca matabaponaenexa xua iru wanaca itacupaeewa tsane xua wapatsiwa tsane bara beicha Nacomtha. Daxota poxonaē baxua exana Jesús naexana pepa sacerdotepin icha matha Melquisedec ichi pon caena bayatha popona.

**Meje yabara xua Jesús pepa sacerdotepin
naexana, icha matha Melquisedec ichi**

7 ¹Bapon Melquisedec caena bayatha Salem tomarapiwi itorobiya pia pepa peewatsinchi. Matautano bapon sacerdotepin pon petsipaebin Nacomtha jiwi nexa, pon Nacom xua itaboco beequiya. Abraham caibe nawirena xua poxonaē nawabchuta xua poxonaē yotaba ainya nacuanpiwi pomonaē jiwi itorobiya pia pepa peewatsiwichi xuano xua poxonaē Abraham juteba barapomonaē. Bapoxonaē Melquisedec matenta iya, Abraham matenta iyatsi. Melquisedec Abraham jeichichi: “Barabu Nacom beta cayawenaena”, jei Melquisedec. ²Abraham nota pocotsiwan xeina pomonaē jiwi itorobiya pia pepa peewatsiwichi xua peamanayabixae poxonaē juteba. Abraham ainyawan capana, xua diez xuanbe. Jiwana wetsatsaba tsiniya xua Melquisedec pecatsinexatsi sacerdotepinxae. Bapon Melquisedec hebreomonaē pijumetha yabara wun caunuta xua jei: “Bapon jiwi itorobiya pia pepa peewatsinchi pon xua beta peexanaein”, jei. Bapon Melquisedec Salem tomarapiwi itorobiya pia pepa peewatsinchi. Barichi barapo Salem wun hebreomonaē pijumetha yabara wun caunuta xua jei: “Juntema popona”, jei. Daxota barapo

naxobe wunbe yabara wun caunutatsi xua jeye: “Pon jiwi itorobiya pia pepa peewatsinchi xua beta peexanaein xuano xua jantema popona”, jei xua hebreo jumetha. ³Nacom Pejume Diwesitha Melquisedec paxa tatsi pewun jopa yabara yopitichi. Matautano pena tatsi jopa yabara yopitichi. Barichi jopa yabara yopitichi pia pamo susato jiwi tatsi. Matautano bapon jopa yabara paebichi ichaxota naexana. Matautano jopa yabara yopitichi ichaxota bapon naxuba. Bapon apara sacerdotepin xua ataya tsitecaeya pon petsipaebin Nacomtha jiwi nexa. Bapon sacerdotepin xua ataya tsitecaeya icha ichi pon Nacom Pexanto tatsi pon pepa sacerdotepin.

⁴Payabara nanta xeinare xua bapon Melquisedec bichocono Abraham tsita ainya cuichi. Abraham pon wamo susatopin bapontha cata xua bayatha diez xuanbetha caewan jiwana wetsatsaba tsiniya. Baxua xua xuan Abraham cata apara xua bayatha yabara amanayaba pomonaetha pomonae jiwi itorobiya pia pepa peewatsiwichi xua poxonae Abraham juteba. ⁵Moisés pia peitorobi coyenewatha jeye: “Sacerdotepiwi pomonae Leví pia pemomoxi susato jiwi tatsi, itacupatsi xua bara nota caewan pocotsiwa xua jiwi catsiba xua poxonae jiwi diez xuanbe caewan jiwana wetsaba pocotsiwan xua xuan xeina”, jei Moisés pia peitorobi coyenewatha. Barapo sacerdotepiwi baxuan exana barapo jiwitha yaitama piamonae tatsi. Matautano exaneiba yaitama barapo jiwi Abraham pia pemomo susato jiwi tatsi icha barapo sacerdotepiwi ichi. ⁶Ichitha Melquisedec jopa Leví pia pemomoxi susato jiwi tatsi. Bequein bapon jopa dapomonaeyo daichitha Abraham catsiba bapontha poxonae caewan jiwana wetsaba tsitsiniya daxita xua diez xuanbetha jiwanan. Abraham xeina peyabara tsiwunae muxu dutsiwan, po peyabara tsiwunae muxu dutsiwan bayatha Nacom yabara tsiwunae muxu duta. Bequein Abraham xeina po peitorobi coyenewa xua itacupatsi xua jeye ichamonaetha: “Barabũ Nacom beta cayawenaena”, xua jei, ichitha Melquisedec baxua Abraham tsipaebatsi. ⁷Jiwi ba yaputane xua ba bichocono ainya cui pon xua jeye: “Barabũ Nacom beta cayawenaena”, pon jei. Bapon bichocono ainya cui beyacaincha pon xua pebaraunchixaetsi. Daxota yaputainchi xua Melquisedec bichocono ainya cui beyacaincha xua Abraham tsipei Melquisedec tsipaeba Abraham xua Abraham tsipaebatsi. ⁸Anoxuae po dapaethe sacerdotepiwi pomonae pomonaetha xua jiwi catsibeiba xua poxonae diez jiwana wetsabeiba, barapo sacerdotepiwi saya jiwi xua saya pewerapaewa tsane. Ichitha nama Nacom Pejume Diwesitha Melquisedec yabara paebatsi pon xua ataya tsitecaeya pepoponaein xua jopa petupaewa. ⁹⁻¹⁰Metha jame be icha iche: Poxonae Abraham cata Melquisedectha poxonae caewan jiwana wetsaba diez xuanbe jiwana, bapoxonae cataunxuae abũ Leví jopa naexanaeyo. Matautano Leví pia pexui tatsi cataunxuae jopa naexanaeyo. Barichi cataunxuae pia pemomoxi susato jiwi tatsi cataunxuae jopa

naexanaeyo. Bapon Leví pon matapainya pepa sacerdotepin canamata canaexana poxona cotacaya ichamonae iru sacerdotemonae naexana. Bapoxonae sacerdotepiwi naexanumenapona. Bapon tsipaebeiba Nacomtha jiwí nexa. Poxonae Abraham catsiba Melquisedectha xua poxonae caewan jiwana wetsaba diez xuanbe Nacom be tsitatsi xua apara be Leví iru cata xua iruru be bara Leví pia pemomoxi susato jiwí tatsi catsiba. Poxonae Abraham cata Melquisedectha xua diez xuanbe caewan jiwana wetsaba, bapoxonae yawa muxuna cata pia pemomoxi susato jiwí tatsi nexa bequein barapomona jopa cataunxuae naexanaeyo.

¹¹Sacerdotepiwi po sacerdotepiwi Leví canamata canaexana sacerdotepin, barapo sacerdotepiwi israelmonae catatsi Moisés pia peitorobi coyenewa tatsi. Daxita barapo sacerdotepiwi Aarón pia pemomoxi susato jiwí tatsi. Barapo sacerdotepiwi jopa itacupaetsi xua jiwí cana exanatsi xua penajuntu coyene xanepana exanaewa Nacomtha xua penatsicuentsiwa yabara xua abe peexanaexae Nacomtha. Bequein sacerdotepiwi exanapona pocotsiwa itoroba barapo Moisés pia peitorobi coyenewatha ichitha awiya jopa itacupaetsi xua jiwí yawenatsi. Daxota jiwí equeicha canamatawenona icha sacerdotepin. Barapo sacerdotepin jopa bewa exanae icha Aarón pia pemomoxi susato jiwí tatsi jiwana ichi. Jame barapo sacerdotepin bewa exanaena icha Melquisedec ichi. ¹²Poxonae Nacom icha sacerdotepin cana exana be pocotsin icha Melquisedec ichi bapoxonae yawa muxuna bewa exanaena pena peitorobi coyenewa. ¹³Barapo pena sacerdotepin pon Wanacanamataxeinaein, bapon baxua yabara paebatsi Nacom Pejume Diwesitha. Bapon apara Israel pemomoxi susato jiwí jiwana pin pomona jiwana xua doce po bicheitobe. Ichitha bapon naexana icha bicheito dena xua Judas pia bicheito dena po bicheito dena bayatha bapana jopa jiwana naexanaeyo sacerdotepin. ¹⁴Daxita jiwí yaputane xua barapon pon Wanacanamataxeinaein naexana Judá barompaya pia pemomoxi susato jiwí dena tatsi. Poxonae Moisés yabara paeba sacerdotepiwi Moisés jopa yabara paebiyo xua Judá pia pemomoxi susato jiwí jiwana tatsi naexanaena sacerdotepin.

¹⁵Daxota waxainchi xaniwaicha bara yaputainchi xua barapo pena sacerdotepin naexana icha sacerdotepiwi yaiwi, icha Melquisedec ichi pon pepa sacerdotepin. ¹⁶Bapon Cristo jopa naexanaeyo sacerdotepin xua poxoru Moisés pia peitorobi coyenewatha pepaebixae xua Leví pia pemomoxi susato jiwí jiwana tatsi bewa naexanaena sacerdotepin. Jame apara Cristo sacerdotepin naexana Nacom pia peayapusu itorobi coyenewatha xua pexeinaexae peajuntucoyenesuwa po peajuntucoyenesuwa ataya tsiteca xua jopa itacupaetsi xua peweraweracaewa. ¹⁷Nacom Pejume Diwesitha Cristo baxua yabara jeichichi:

“Xam sacerdotepim naexaname ataya xua
 petsitecaenexa, barapo sacerdote yajiwim
 icha Melquisedec ichi xua sacerdotepin”,
 jei Nacom Pejume Diwesitha,
 xua Cristo yabara paebatsi.

¹⁸Nacom cana exana xua Moisés pia peitorobi coyenewa tatsi jiwi jopa canantawenonaeyo tsipei barapo coyenewa jopa xeinaeyo peayapusuwa xua jiwi cana exanatsi xua jopa pexeinaewa penatsicuentsiwa xua abe peexanaexae Nacomtha. Matautano jopa itacupaetsi xua jiwi pecanaexanaewatsi xua pecapanenebiwatsi abe pia peexanae cuiru coyene weya. ¹⁹Barapo Moisés pia peitorobi coyenewa tatsi bapana jopa itacupaetsi xua jiwi juntu coyene xanepana exanatsi Nacomtha. Daxota anoxuae pena coyenewa xeinatsi xua ainya cui beyacaincha po coyene xua copiya. Barapo pena coyenewa naca cana exana xua wunaewatatsi pocotsiwa Nacom exanapaeba xua barapo pena coyenewaxae daxota anoxuae Nacom naca yaputane xua piamonaexae tatsichi.

²⁰Nacom xainyeya yabara tsiwuna muhu duta pia pewuntha xua Cristo naexanaena sacerdotepin xua ataya tsitecaeya. Jopa nama Nacom pia pewuntha yabara tsiwuna muhu dutsiyo xua sacerdotepiwi penaexanaenexa pomonae Levi pia pemomoxi susatopiwi tatsi. ²¹Ichitha poxonae Cristo pon jiwi Pecanamataxeinaein sacerdotepin naexana, bapoxonae ichun, Cristo yabara paebatsi Nacom Pejume Diwesitha, jeye:

“Nacom pia pewuntha yabara tsiwuna
 muhu duta, ichawa jopa toxeincha
 yabara exanae tsane.

Poxonae Nacom yabara tsiwuna muhu duta,
 bapon jeye Pexantotha: ‘Xam sacerdotepim
 xua ataya petsitecaenexa’, jei Nacom”,
 jei ichun xua Nacom tapaebatsi
 Nacom Pejume Diwesi.

²²Poxoru Nacom tsiwuna muhu duta xua Jesús naexanapaeba sacerdotepin daxota Nacom tsita itapeinya xeina xua exanaena xua bayatha paeba barapo pena coyenewatha. ²³Bayatha sacerdotepiwi pinmonae tsoponae. Ichitha barapo sacerdotepiwi naitapataya werapouneiba, yawa ichamonae naexana sacerdotepiwi. Dapon aibi barapo sacerdotepiwi jiwana pon itacupatsi xua pewetsiwa pia peexanae coyenewan tsipei daxita werapouneiba. ²⁴Ichitha poxoru Jesús ataya asu pepoponaexae daxota ataya tsitecaeya exanaena pia peexanae coyenewa icha pepa sacerdotepin ichi. Jopa nantawenonaeyo xua ichun Jesús pecoutha tanacuitatsi pon xuya sacerdotepin naexana. ²⁵Daxota bapon ataya tsitecaeya itacupatsi xua jiwi ataya pecapanenebiwatsi pomonae xua pepatsiwa tsane Nacomtha pomonae xua Nacom peyaputaewi

pejume cowuntsi jiwixae Jesús. Jesús baxua exana ataya tsitecaeya asu pepoponaexae xua pewucaenexa Nacomtha xua barapo jiwi peyawenaenexatsi.

²⁶Nacom tsita xanepanatsi xua Jesús pepa sacerdotepin naexana xaniwaicha, po sacerdotepin wacanamatawenonaexae. Yatsicaewa bapon bichocono pejuntũ coyene xanepanaein Nacomtha. Bapon Jesús jopa abe exanaeyo ichamonaetha. Nacom tsitatsi xua Jesús jopa natsicuentziyo poxoru abe jopa exanaeyo Nacomtha. Bapon Jesús seicaya exana ducuaenaebiya. Jopa exanaeyo icha be ichi pomonae abe peexana dubenanaebiyaewi. Bapon Jesús Paxa capoinchi po itaboco tajũ beicha po itaboco beyacaincha xua necoichatsi xua Jesús barapo itaboco beicha Paxa ainya cui exanatsi. ²⁷Pepa sacerdotepiwi ba bewa exaneibina po coyene xua duwei jutebeiba iboto matatsuntha xua tuxusi exaneiba Nacom nexa, daxita maticabintha tsaibi. Baxuan nata exaneiba copiya abe pia peexanae coyenewan nexa. Bapoxonae cotacaya jiwi taexaneibatsi abe pia peexanae coyenewan nexa. Nama Jesús jopa barichiyo. Nama seicayiya icha coyeneya exana. Bapon Jesús pia pepon nata caenaeta xua tũpa exanatsi saya bara cae cui coyenetha daxita carepaya jiwi nexa xua jiwi abe pia peexanae cuiru coyenewan tatsi nexa. ²⁸Moisés pia peitorobi coyenewa tatsi canacui coyene exanatsi xua bara saya jiwi naexana pepa sacerdotepiwi. Barapo pepa sacerdotepiwi abe exana xua saya pecui pawĩ. Barapomonae jopa pejuntũ cui coyene xanepanae jiwi Nacomtha. Ichitha Nacom yabara tsiwũnae muxu duta pia wũntha xua Pexanto cana exana pepa sacerdotepin, po sacerdotepin yatsicaewa ataya tsitecaeya bichocono pejuntũ coyene xanepanaeinxae Nacomtha. Baxua Nacom exana xua yabara tsiwũnae muxu duta xua pepuya weya tatsi poxonae Moisés catatsi peitorobi coyenewa.

Meje yabara xua Jesús pon pejume yawenaein jiwi Nacomtha

8 ¹Anoxuae xua pocotsiwa xua bichocono peainya cui coyenewa meje baxue: Waxainchi xeinatsi yatsicaya pepa wasacerdotepin, pon yatsicaewa bichocono pejuntũ coyene xanepanaein Nacomtha xuaunxuae yabara paca tsipaebatsi. Bapon eca pia peitũpanae ecaethopaewatha Nacom pia pecoxa weya tatsi, peitabocothaicha. ²Anoxuae Jesús nacuita Nacom pia xantheicha tatsi po penacuichi coyeneya sacerdotepiwi exana Nacom pia botha tatsi xua itabocothaicha. Barapo bo yatsicaewa Nacom pia pexainyei bo tatsi ichaxota popona xua itabocothaicha. Nacom pon jiwi Pecanamataxeinaein exana barapo bo. Jiwi jopa exanaeyo barapo bo.

³Nacom daxita carepaya pepa sacerdotepiwi yabara tsiwũn dubatsi xua jiwi petaexanaenexa tsaibi tsainchi po coyene pocotsiwa xua jiwi amanaya pecatsiwa Nacomtha. Matautano barapo pepa sacerdotepiwi

yabara tsiwun dubatsi xua jiwi petaexanaenexa tsaibi tsainchi po coyene xua duwei pejutebiwa pocotsi duwein xua jiwi amanaya pecatsiwa Nacomtha xua abe peexanaexae. Daxota Jesús iru bewa bara ichiya exanae xua Nacom taexanatsi ichi sacerdotepiwi ichi poxonae Nacom taexanatsi. ⁴Ichametha barapo dapaetha Jesús poponaetsipa barapo irathe poxonae iruru jinompa barapo sacerdotepiwi po sacerdote Aarón yaiwi jopa itacupaetsipaetsi xua cana exainchi pepa sacerdotepin. Tsipei cataunxuae barapo irathe sacerdotepiwi yaiwi exanapona pocotsiwa Nacom nexa xua Moisés pia peitorobi coyenewatha pecui itorobixae. ⁵Ichitha barapo sacerdotepiwi tanacuita be pocotsiwa xua saya penajupae coyenewa xua jopa pexainyei coyenewa. Pocotsiwa jame xua pexainyei coyenewa, baxua jame Jesús exana peitabocotha. Pocotsiwa xua barapo sacerdotepiwi tanacuita saya be penajupae coyenewa ichitha xaniwaicha jopa najupaeayo xua be pocotsiwa Jesús exana peitabocotha. Baxua yaputainchi poxonae Nacom Moisés tsipaebatsi. Poxonae Moisés muxu pecuaranotsi anseraboco xua ichaxota jiwi wunae jainteibina Nacomtha bapoxonae Nacom Moisés tsipaebatsi. Nacom jeye: “Yabara nanta xeinare xaniwaicha xua daxita beta neexanaenexa anseraboco xua bayatha pocotsiwa yabara catsita itapeinya xeinatsi demxuwatha. Barapocotsi anserabocontha seicaya jiwi newunae jainchina”, jei Nacom. ⁶Nama Cristo, yatsicaya pon wasacerdotepin, bapon exana itaboco beicha pocotsiwa xua yatsicaewa bichocono peainya cui coyenewa. Barapo coyene bichocono ainya cui beyacaincha po coyenewa xua peru coyenewa xua po coyeneya icha sacerdotepiwi exaneiba barapo irathe. Cristo jiwi yabara jume yawenatsi Nacom beicha xua jiwi pepatsinexa Nacomtha. Barapo pena coyenewa Nacom yabara tsiwunae muxu duta xua bichocono wunae beyacaincha barapo peru coyenewa po coyenewa pocotsiwa sacerdotepiwi exaneiba. Barapo pena coyenewa jiwi juntu coyene xanepana exanatsi Nacomtha. Ichitha barapo peru coyenewa jopa daichiyo.

⁷Bayatha peru petsiwunae yabara muxu dutsiwa Nacom Moisés yabara tsiwunae muxu dutatsi. Ichametha barapo coyenewa xeinaetsipa peayapuswa xua daxota jiwi beta juntu coyene xanepana exanatsi Nacomtha, metha jopa nantawenonaetsipae icha pena petsiwunae muxu dutsiwa. ⁸Ichitha Nacom tane xua barapo jiwi jopa pejuntu coyene xanepanae jiwi bapontha poxonae barapo peru peyabara tsiwunae muxu dutsiwa xeina. Daxota ichun Nacom Pejume Diwesitha jeye:

“Nacom jeye: Maticabin othopaena, po maticabintha pena petsiwunae muxu dutsiwa exanaein Israel nacuapiwi pia pemomoxi susato jiwitha tatsi iru Judea nacuapiwi pia pemomoxi susato jiwitha tatsiru.

- ⁹ Jopa bara jũta coyeneya ichin tsane poxonae matha icha ichin painya amo susato jiwitha. Barapo coyene barapomonaetha catan poxonae matacaponan Egipto nacua weya. Daichitha barapomonaetha jopa nacui yabara wũnaetsiyo xua peexanaenexa pocotsiwa itoroban poxonae catan barapo peyabara tsiwũnae muxu dutsiwa barapomonaetha. Daxota barapomonaetha punapentan, xua jopa tayawenaewa tsane, jei Nacom”, jei ichũn.
- ¹⁰ Equeicha ichũn jeye:
 “Nacom jeye: Barapo peyabara tsiwũnae muxu dutsiwa Israel nacuamonaetha, poxonae barapo matacabin wetsina bara baxua exanaein. Janje: Jiwi pejũntũ coyenewatha ichaxota nanta xeina taitorobi coyenewa baxota dubin. Bapoxonae barapomonaetha neyaputaena yawa nejume cowũntsiya jejei tsane. Tacoutha barapomonaetha pia Nacom tatsi naexanaein. Barapomonaetha tamonaetha naexanaena.
- ¹¹ Dapon aibi pon bewa cuidubina ichũnthã xua xan yabara, xuano xua cuidubina pia jitontha xua xan yabara, mataũtano xua cuidubina peweicho xua xan yabara petana neyaputaewanexa tsane. Jopa bewa cuidubi tsane barapomonaetha tsipei daxita jiwi neyaputaena pomonaetha pecui pawĩ jiwi, irũno pomonaetha peainya cui jiwi.
- ¹² Xan barapomonaetha cui yabara jũntemainaein abe pia peexanaetha cuiru coyenein tatsi, xua jopa pexeinaewa tsane xua tana netsita natsicuentsiwa xua abe peexanaewaxae. Bapana ataya equeicha jopa yabara nanta xeinaein tsane barapo abe peexanaetha cuiru coyenein, jei Nacom”, jei ichũn Nacom Pejume Diwesitha xua saya Nacom tapaebatsi.
- ¹³ Nacom yabara paeba pena peyabara tsiwũnae muxu dutsiwa tsipei po peyabara tsiwũnae muxu dutsiwa copiya Moisés yabara tsiwũnae muxu dutatsi saya peru jume. Pocotsiwa ba peru coyenewa ba saya weraweraca. Daxota barapo peru peyabara tsiwũnae muxu dutsiwa saya irũ weraweraca.

Meje yabara xua Nacom pin pia bo tatsi po bo xua itabocotheicha uncuu xuano iruru po bo xua po irathe tsique uncuu

9 ¹Nacom copiya Moisés yabara tsiwunaee muxu dutatsi. Barapo peyabara tsiwunaee muxu dutsiwa peitorobi coyenein xeina xua pocotsi coyeneya israelmonaee bewa exanaena poxonaee nacaetuta xua wunaee pejainchinexatsi Nacom. Matautano barapo peyabara tsiwunaee muxu dutsiwa itoroba xua jiwi xeina po bo xua Nacom pia bo tatsi xua po irathe. ²Barapo Nacom pia bo jiwi exana duweein pebecoton xua be anseraboco. Barapo anseraboco ainya tutube xeina. Po tutu copiya dena pewun: “Nacom pia tutu po tutu ainya cui tutu xua jopa pexeinaewa peabe cuiru”, jei. Barapo tututha uncuu penainto po penaintotha itanatanota penasiwa. Matautano barapo tututha uncuu xua pexaethopaewa po pexaethopaewatha xua baxota jeba pan, po pan xua Nacom catatsi. ³Paparuwa xua dutsica barapo paparuwa pewuna werena icha tutu xeina po tutu pewun: “Yatsicaewa Nacom pia tutu po tutu bichocono pepa peainya cui tutu xua jopa xeinaeyo peabe cuiru”, jei. ⁴Barapo tututha uncuu xua be pecaxaethopaewa xua u penainto xua oro wun nainto. Baraxota yubeibiya tauteibathopa petuxueiwa po petuxueiwa tuxusi tuxuei benata poxonaee tauta. Matautano barapo tututha uncuu xua be caja po caja pewun: “Nacom pia peyabara tsiwunaee muxu dutsi caja”, jei. Barapo caja pewuna weya daxita matapaeeicha caxueba oro naintontha. Barapo caja juntututha eca coroto xua oro nainto. Barapo corototha tsijuntutu boca po pexaewa pewun maná matawun xua itaboco pia pexaewa. Matautano barapo caja juntututha boca penacobenababi naewa po penacobenababi naewa bayatha Aarón xeina. Barapo naewa bayatha Nacom xuwa exana xua tsiwixi pirururujei poxonaee pexeinya petsita itutsi coyene exana pia peayapusu itorobi coyeneyatha. Matautano barapo caja juntututha bobena iboton po ibotontha mata tinaduba Moisés pia peitorobi coyenewa. ⁵Barapo caja pemata xatatsiwa jumatha nacueyatabe ecabe ainya querubinbe matawunbe xua jumope canaxobiya exana oro naintotha, ponbe be matatsunpinbe. Barapo ainya querubinbe matawunbe yabara caunuta xua Nacom baxota eca. Barapo ainya querubinbe matawunbe naitama taecabe yawa nacuarafe yeyetecabe xua itata barapo caja pemata xatatsiwa. Matautano irabe tayecarecabe ichaxoya pejana nunubabareca po jana duweein jana. Barapo duweein sacerdotepin bexuba jiwi abe pia peexanaee cuiru coyenein tatsi nexa. Anoxuae baxua yabara equeicha jopa bepaca tsipaebichi.

⁶Daxita nacui wunaeta pocotsiwa xua barapo tutubetha nexa. Bapoxonaee sacerdotepiwi joneibeibiya daxita matabi po tututha xua copiya dena. Barapo sacerdotepiwi barapo tututha exaneiba pia

penacuichiwa. ⁷Ichitha nama po tutu dabeya saya meisa joniyeiba pon pepa sacerdotepin xua saya caethotha tsaibi xua daxita weithan tsaibi. Poxonae barapo pepa sacerdotepin barapo tutu iya joniya bewa nata cajoniyaena duwein jana. Barapo jana n̄n̄ubaba ichaxota querubinbe mataw̄nbe itabarayo deca xua bapon abe pia peexanae cuiru coyenewan tatsi nexa xuano xua ir̄u jiwi abe pia peexanae cuiru coyenewan tatsi nexa xua poxonae jiwi jopa nacui yabara yaputaeyo. ⁸Peyabara exanaewa daxita baxuan Nacom pia Pejumoŋe t̄nax̄u tatsi naca cuiduba xuaje: Poxonae cataunxuae sacerdotepiwi taexana dubenanaebiya Nacom po tututha xua copiya dena, jiwi jopa copatsichi xua pata po tutu dabeya ichaxota Nacom popona. ⁹Daxita pocotsiwan barapo anserabocototha caena bayatha exana yabara caunuta xua anoxuae wayabara yaputaenexa baxua xua pocotsiwa anoxuae exana. Jiwi Nacom w̄nae jainteibatsi poxonae sacerdotepin exaneiba pocotsiwa xua jiwi pecatsiwa Nacomtha xuano xua poxonae exaneibano xua duwei pejutebiwa xua tuxusi exana Nacom nexa. Bara bequein jiwi baxua exaneiba ichitha cataunxuae pia j̄unt̄u coyenein tatsi cana exanatsi xua awiya yabara nanta xeina dubenanaebiya abe pia peexanae cuiru coyenein tatsi. Barapo coyene po coyene jiwi exana jopa beta j̄unt̄u coyene xanepana exanaetsi xua jopa penatsicuent̄siwa tsane Nacomtha xua abe peexanaexae. ¹⁰Barapo peru peitorobi coyenewa xua Moisés pia peitorobi coyenewa tatsi jiwi jopa yawenaetsi xua penaj̄unt̄u coyene xanepana exanaewa Nacomtha. Saya apara yabara paeba xua jiwi bewa pocotsiwa xaibina poxonae nabaneiba, matautano xua xuan pocotsiwa bewa apeibina. Matautano jiwi itorobatsi xua po coyenein yabara xua jiwi beta penaper̄u xainwaetsiya nowaewa yabara pia w̄nae jainteibichi Nacom. Barapo coyenein xua saya jiwi bewa cana exanae pia pepontha beya xua anoxuae Nacom pena coyenewa equeicha exana.

¹¹Nama Cristo patopa pon pepa sacerdotepin. Bichocono yatsicaewa pexeinya coyenewa xua pena coyenewa nacata capatopa po coyenewa xua anoxuae waxainchi xeinatsi. Po tutu ichaxota bapon nacuiteiba icha pepa sacerdotepin ichi xua itabocotha bichocono w̄nae tsipei Nacom daxita matapaecha wetsiya exana. Barapo tutu bichocono w̄nae beyacaincha po tutu ichaxota sacerdotepiwi tanacuita Nacom xua barapo cae pin nacuathe. Jiwi jopa acabiyo barapo tutu xua itabocotha tsipei barapo tutu jopa apara po cae pin nacuathe tsique nexiyo. ¹²Cristo joniya ichaxota yatsicaewa Nacom pia xantha. Bara xoteicha Cristo jopa caponaeyo duwein jana po duwein pew̄n chivo, xuano xua vaca jana jopa caponaeyo xua pen̄n̄ jana, xua pebto jana. Saya jame Cristo Nacom tsita itutatsi xua bapon jiwi tsit̄upatsi xua abe pia peexanae coyenewan tatsi. Bapon Cristo saya bara cae coyenewatha joniya baxoteicha xua daxita carepaya jiwi nexa. Daxota bapon Cristo

bara ataya tsitecaeya naca capanepa. ¹³Sacerdotepiwi ba nota vaca pebton pia pejanan, yawa chivo pia pejana xuano ipuna xua poxonae tautatsi vaca pesowatiyo peweinyo. Sacerdotepiwi mata wenunubaba jiwi daxita baxuantha pomonaetha pomonae xua abe peexanae cuiru coyenein peexanaewixae. Bara bapoxonae barapo coyene jiwi itacupatsi xua cana exanatsi xua jopa penataxobiwa pia pepontha bequein awiya xeina penatsicuentisiwa. ¹⁴Bequein bara baxuan barapo jiwi tsiwiyo yawenatsi xua jopa petaxobiwatsi pia pepontha ichitha nama Cristo pia pejana tatsi barapomonaе bichocono yawenatsi. Cristo pejana bichocono peayapusu coyenewa xeina beyacaincha xua duwein pejana. Nacom pia Pejumope tunaxu tatsi po jumope ataya tsitecaeya popona barapo pejumope tunaxu tatsi Cristo yawenatsi poxonaе saya Cristo nayabara cui copata xua bara pebexubinexatsi poxonaе pejana pichapabarena pewan weya petupaewatha. Bapon Cristo jopa bapana exanaeyo peacoyenebewa. Cristo wanaca tsitupaexae Nacom naca juntu coyene xanepana exana. Daxota Nacom jopa tsita natsicuentichi abe waexanaexae. Wajuntu coyene equeicha jopa yabara wanaca tsipaebinxе abe waexanae coyene. Daxota jopa bewa ponae tsainchi ichaxota ataya atene tsaibi pomonae jopa pejume cowantsiwi. Anoxuae jame naca itacupa xua ajuntusuya taexana dubenanaebiyatsi Nacom pon xua ataya tsitecaeya asu pepoponaein.

¹⁵Daxota bapon Cristo naexana pon nacata paeba Nacomtha yawa pon naca tsipaeba Nacom nexa. Bapon Cristo nacata catsica Nacom pia pena peyabara tsiwunae muxu dutsiwa tatsi. Bapon naca cana exana xua daxitatsi caemonae naexanatsi Nacomtha. Poxonaе naca tsitupa Nacom yabara juntemaina abe peexanae cuiru coyene po peabe exanae cuiru coyenein xua jiwi caena bayatha exana poxonaе cataunxuae exanapona po coyene bayatha Nacom Moisés yabara tsiwunae muxu dutatsi xua peru peyabara tsiwunae muxu dutsiwa. Daxita pomonae Nacom pewabixae barapomonaе catsibinchi peajuntuyapusuwa po peajuntuyapusuwa xua ataya tsitecaeya tsane xua bayatha Nacom peyabara tsiwunae muxu dutsixae barapomonaetha. ¹⁶Poxonaе pebin ba ichichipa cata pia pecopiniwa ichamonaetha xua poxonaе tupaena, copiya matha yabara caununaya wun tinaduba paperatha pomonae xua pecopiniwa xeinaewa tsainchi. Pomonae xua pecopiniwa xeinaewa tsainchi barapomonaе bewa tsita itapeinya xeinaena xua barapo pebin xaniwaicha bara tupa xua poxonaе beya pewunaeya tsane xua pecopiniwa notsinexatsi pon xua tupa. Bapoxonaе barapomonaе bara itacupatsi xua pexeinaewa pocotsiwa xua bapon xeina pon tupa. ¹⁷Barapo papera, po paperatha bayatha pebin nacopiniwa yabara jume tinaduba cataunxuae jopa ainya cuiyiyo poxonaе abu cataunxuae bapon popona tsipei jopa copiniwa notichi barapomonaе. Saya jame poxonaе bapon yatsicaewa tupa bapoxonaе jame ainya cui

barapo papera, tsipei barapomonaē itacupatsi xua pexeinaewa tsane pocotsiwa bapon xeina. ¹⁸Barichi barapo copiya peyabara tsiwūnae muxu dutsiwa. Pewūnaeya tsane xua poxonaē jiwi xeinaena pocotsiwa bayatha Nacom Moisés yabara tsiwūnae muxu dutatsi sacerdotepin bewa matha duwein bexubina xua bapoxonaē barapo coyene jiwi pexeinaewa tsane. ¹⁹Moisés daxita pia peitorobi coyenewan yabara paeba daxita jiwitha. Nexata bapon pena xua oveja na xua tsobia naewiyotha opi yarabaxuba, po naewiyotha pewūn hisopo naeyo. Bapon mene muxunaxuba vaca jana poyo peweinyo pebtiyo xuano xua muxunaxuba chivo jana. Bapoxonaē baxuan bapon Moisés nūnūbaba Nacom Pejume Diwesitha. Mataūtano daxita jiwitha mata wenūnūbaba. ²⁰Bapoxonaē Moisés daxita jiwitha jeye: “Barapo jana po janatha paca mata wenūnūbabatsi apara Nacom itoroba xua tapacata exanaewatsi tsainchi. Baxua paca tsita itapeinya xeina xua Nacom xaniwaicha bara pacata exanaena pocotsiwa pia peyabara tsiwūnae muxu dutsiwa”, jei Moisés. ²¹Barichino Moisés exana xua anseraboco mata wenūnūbaba pejanatha. Mataūtano muxuna mata wenūnūbaba xua xuan barapo anserabocototha tututha umena pocotsiwan sacerdotepiwi canacuiteiba poxonaē jiwi nacaetuteiba xua Nacom wūnae pejainchinexatsi. ²²Moisés pia peitorobi coyenewantha tatsi itoroba xua bara imoxoyo daxita coyeneintha bewa pejanantha mata wenūnūbabi xua daxita baxuan Nacom jopa petsita nataxobinexatsi. Nacom jopa yabara jūntemainaeyo jiwi abe pia peexanae cuiru coyenein tatsi icha jopa pejana epa-epacaeayo xua barapo jiwi nexa.

Meje yabara xua Cristo tsitupa jiwi abe pia peexanae cuiru coyenewan tatsi

²³Sacerdotepiwi bewa jutebina duwei pemata wenūnūbabinexa pejanatha anseraboco. Bapoxonaē Nacom petsita xanepanaenexatsi xua jopa nataxobiyo barapo anseraboco xuano xua xuan tututha umena. Barapo coyene saya yabara caunuta xua yatsicaewa pepa coyenewa Cristo exana peitabocotheicha. Ichitha nama barapo yatsicaewa pepa coyenewatha peexanaenexa peitabocotheicha jame bewa pejana epa-epacae pejana pon pejūntū coyene xanepanaein pon peainya cuin pia pejana tatsi xua Nacom tsita jiwi xanepanatsi xua jopa penatsicuentisiwa xua abe peexanaexae Nacomtha. Barapo jana bichocono ainya cui beyacaincha duwein jana po jana xua sacerdotepiwi nūnūbaba po cae pin nacuathe. ²⁴Poxonaē Cristo joniya Nacom pin pia botha tatsi xua itabocotheicha jopa joniyaeyo po bo saya jiwi exana po cae pin nacuathe xua Nacom pin pia bo tatsi. Barapo bo xua Nacom pin pia bo saya yabara caunuta xua yatsicaewa peitabocotheicha xeina pepa Nacom pin pia bo tatsi. Jame Cristo joniya Nacom pin pia botha tatsi, xua Nacom pia nacuatheicha tatsi xua itabocotheicha. Baxoteicha anoxuae Cristo naitūta Nacomtha xua wanacata tsipaebinexa Nacom peitabaratha. ²⁵Pon

pepa sacerdotepin bewa joniyaena bara saya caetotha tsaibi xua daxitan weithan tsaibi ichaxota po tutu yatsicaewa Nacom pia tutu xua po tutu bichocono yatsicaewa peainya cui tutu xua barapo anserabocotha. Barapon pejana capaneiba barapo tututha xua duwein jana xua jopa barompaya pia pejana tatsi. Nama Cristo jopa nantawenonaeyo xua nayabara cui copata xua matowa tupa pecana exanaewatsi xua jiwi abe peexanae cuiru coyenein tatsi nexa. ²⁶Ichaxua tsipae bapoxonae bapon matowa tupa exaneibichipatsi xua bexubeibatsi xua poxonae Nacom aena barapo cae pin nacue forota xua beya anoxuae. Ichitha nama anoxuae weta xua peru dapae tsipei bapon Cristo patopeica barapo cae pin nacuathe petupaenexa xua saya bara cae coyenewatha ataya petsitecaenexa tsane. Bapon Cristo naetotha tsitupa jiwi xua Nacom jiwi peyabara cui juntemainaenexatsi abe pia peexanae cuiru coyenein tatsi. ²⁷Daxita jiwi ba werapouneibina saya caetotha. Bapoxonae pirapae Nacom yabara paebina daxita jiwi xua penatsicuentisiwa xua abe peexanaexae. ²⁸Barichiru, icha jiwi ichi Cristo saya caetotha tsitupa jiwi pinmonae, xua Nacom jiwi abe pia peexanae cuiru coyenein tatsi pecayabara juntemainaenexa tsainchi. Equeicha bexa tsane patopeicaena po cae pin nacuathe. Jopa tsipatopeicae tsane xua equeicha petsitupaewa tsane jiwi abe pia peexanae cuiru coyenein tatsi. Jame tsipatopeicaena xua pecapanenebiyaenexa pomonaetha pomonae pia pewunaewatsi jiwixaetsi xua bapon pepatopaewa po cae pin nacuathe tsique.

10 ¹Moisés pia peitorobi coyene tatsi, baxua saya yabara caunuta xua yaputane wanaca exanaenexa po coyene xua wunaewatsi po coyene xua bexa Nacom exanaena itabocotha. Barapo coyene, jopa pepa coyenewiyo poxoru jopa jupaeyo po coyene xua Nacom yatsicaewa xeina itabocotha. Moisés pia peitorobi coyenewa tatsi jopa itacupaetsi xua jiwi pejuntu coyene xanepana exanaewatsi Nacomtha pomonae wunaewatsi jainteiba Nacom. Bequein pepa sacerdotepiwi daxita weitha exaneiba xua duwei jutebeiba jiwi abe pia peexanae cuiru coyenein tatsi nexa daichitha cataunxuae jopa itacupaetsi xua jiwi juntu coyene xanepana exanatsi xua jopa pexeinaenexa xua penatsicuentisiwa xua abe peexanaexae Nacomtha. ²Ichaxua Moisés pia peitorobi coyene tatsi jiwi juntu coyene xanepana exanaetsipatsi Nacomtha bapoxonae sacerdotepiwi jopa equeicha nantawenonaetsipae xua equeicha pejutebeibiwa duwei jiwi abe pia peexanae cuiru coyenein tatsi nexa. Ichaxua jiwi caetotha juntu coyene xanepanaetsipa Nacomtha, bapoxonae jiwi jopa natsicuentisiwa xua abe peexanaexae Nacomtha. ³Ichitha poxonae barapo sacerdotepiwi jutebeiba duwei jiwi abe pia peexanae cuiru coyenein tatsi nexa bequein baxua exana cataunxuae jiwi cana exanatsi xua yabara juntanaina barapo abe pia peexanae cuiru coyenein tatsi. Jiwi yabara juntanaineiba baxuan daxita weitha poxonae duwein jutebeibatsi barapo jiwi nexa. ⁴Vaca pebto pia pejana tatsi yawa chivo pia pejana tatsi jopa bapana jiwi juntu coyene

wenotichi abe pia peexanae cuiru coyenein tatsi xua jopa penatsicuentisiwa nexa Nacomtha xua abe peexanaexae.

⁵Daxota poxonaе Cristo patopa po cae pin nacuathe tsique, Cristo jeye Nacomtha:

“Xam jopa ichichipaem po coyene xua duwein pebexubiwa jiwi abe pia peexanae cuiru coyenein tatsi nexa.

Matautano jopa ichichipaem xua po coyenein xua jiwi amanaya necacatsiwa.

Jame pebaxuanexa yatsicaewa pepa jiton necana exaname xua naexanan, tatsitupaenexa jiwi abe pia peexanae cuiru coyenein tatsi nexa.

⁶Xam jopa cajuntа coyene weiweina exanaeyo poxonaе duwein ompin tautatsi xuano xua pexaewa tauta petuxusi exanaenexano xua xam neyabara juntemainenexa jiwi abe pia peexanae cuiru coyenein tatsi.

⁷Bapoxonaе xan Cristo, janje:

‘Xam Tanacom.

Xan xote po nacuathe patopeicanje taexanaenexa xua pocotsiwa ichichipame be pocotsi coyeneya necui yabara tina jinya diwesitha’, jan”, jei Cristo.

⁸Copiya Cristo paeba xua jeye: “Xam jopa ichichipaem yawa jopa cajuntа coyene weiweina exanaeyo po coyene xua poxonaе jiwi bexuba duwein xuano poxonaе exaneiba po coyene poxonaе jiwi amanaya cacatsibeiba. Matautano jopa ichichipaem poxonaе duwein ompin tautatsi xua jiwi abe pia peexanae cuiru coyenein tatsi nexa”, jei Cristo. Baxua Cristo paeba tsipei Moisés pia peitorobi coyenewatha itoroba xua jiwi bewa exanaena barapo coyenein Nacom nexa. ⁹Equeicha bapoxonaе Cristo cotacaya jeye: “Xan xote po cae pin nacuathe patopeicanje taexanaenexa pocotsiwa ichichipame”, jei. Poxonaе Cristo baxua caunutsiya paeba copiducia cana exana po coyene peru coyene. Cristo anoxuae equeicha pecoutha pena coyene exana poxonaе naetha tsitupa jiwi abe pia peexanae cuiru coyenein tatsi. ¹⁰Nacom naca juntа coyene xanepana exana wanaca cana exanaenexa piamonaе tatsi poxoru Jesucristo exana pocotsiwa Nacom peichichipaexae. Jesucristo pia pepon nacaenaeta Nacomtha xua naetha petsitupaenexa daxita jiwi abe pia peexanae cuiru coyenein tatsi xua bara cae coyenewatha xua ataya petsitecaenexa tsane.

¹¹Daxita sacerdotepiwi pomonaе judiomonaе daxita matakabi exaneiba xua duwein pebexubiwa, bequein barapo coyenewa jopa itacupaetsi

xua jiwi jũntũ coyene wenotatsi abe pia peexanae cuiru coyenein tatsi. ¹²Nama Jesucristo bara cae coyenewatha exana poxonae naetotha tsitũpa jiwi abe pia peexanae cuiru coyenein tatsi, xua bara ataya tsane. Poxonae Cristo baxua nacui weta Nacom pia pecoxatheicha tatsi equiya xua itabocothaicha. ¹³Baxoteicha Cristo abũ ewata beya poxonae abũ tsane poxonae Nacom cana exanaena xua Cristo cana exanaeinchi xua pecanamataxeinaenexa pia peaitafaetabi jiwichi. ¹⁴Cristo piamonae jũntũ coyene xanepana exana xua ataya tsane poxonae naetotha tsitũpa cae coyenewatha. Barapomonae pomonae xua Nacom tsitatsi xua jopa xeinaeyo penatsicuentiwa pomonae piamonaexae tatsi. ¹⁵Nacom Pia Pejumope tũnaxũ tatsi baxua yabara irũ naca tsipaeba bayatha Nacom Pejume Diwesitha, jeye:

¹⁶“Matacabin othopaena po matacabintha xan tayabara tsiwũnae muxu dutsiwa xua pena coyenewa exanaein barapomonaetha. Jiwi pia jũntũ coyenewantha xua ichaxota nanta xeina taitorobi coyenewa baxota dubin”, jei Nacom pia Pejumope tũnaxũ tatsi.

¹⁷Bapoxonae equeicha Nacom pia Pejumope tũnaxũ tatsi jeye: “Bapana ataya equeicha jopa yabara jũntanainaein tsane jiwi abe pia peexanae cuiru coyenein tatsi”, jei Nacom pia Pejumope tũnaxũ tatsi, Nacom Pejume Diwesitha.

¹⁸Daxota poxonae Nacom yabara jũntemaina jiwi abe pia peexanae cuiru coyenein tatsi, equeicha jopa nantawenonaeyo xua jiwi duwein pebexubiwa xua tuxusi exana Nacom nexa xuano xua po coyene exaneiba xua po coyene Nacom amanya pecatsibeibiwatsi.

Meje yabara xua waxainchi bewa wajũntũ coyeneyatha nanta xeinaetsi xua bara apara imoxoyo itiya jinompatsi Nacom

¹⁹Tamonae pam, daxota anoxuae naca itacũpa xua jopa junuwiya patsi tsainchi itabocothaicha ichaxota yatsicaewa Nacom pia tutu, po tutu bichocono peainya cui tutu. Daxota baxua naca itacũpa tsipei Nacom yabara copata xua bara Jesucristo naca tsiwanaya patopa barapo tututha pejana pichapabarenaexae poxonae naetotha naca tsitũpa. ²⁰Anoxuae naca itacũpa xua wapatsiwa Nacomtheicha pena jũntũ coyene waxeinaexae po pena jũntũ coyene ataya ayapusũ xua poxonae Cristo wanaca tsitũpaexae. Baraxua be poxonae metha Cristo nacata pataxubichipa paparuwa po paparuwa yacaincha ducua Nacom pia tutu po tutu yatsicaewa peainya cui tutu. Daxota jojoniyaeinchi wajinompænexa Nacomtha. ²¹Bapon Jesús, yatsicaewa wasacerdotepin,

pon canamataxeina Nacom pia bo tatsi xua itabocothieicha. ²²Daxota bewa wajüntü coyeneyatha nanta xeinaetsi xua bara apara imoxoyo itiya jinompatsi Nacom, xua yatsicaewa xainyeya wajüntü coyene xanepanaexae bapontha. Matautano bewa wajüntü coyeneyatha nanta xeinaetsi xua bara apara imoxoyo itiya jinompatsi Nacom xanepanaya wajume cowuntsiya jinompaexae. Matautano bewa wajüntü coyeneyatha nanta xeinaetsi xua bara apara imoxoyo itiya jinompatsi Nacom tsipei jopa jüntü coyene auratsi xua jopa watsita natsicuentisixae xua abe waexanaexae. Matautano bewa wajüntü coyeneyatha nanta xeinaetsi xua bara apara imoxoyo itiya jinompatsi Nacom tsipei poxonae ichamonae naca bautisaba meratha tsita itapeinya xeinatsi xua Nacom bayatha naca jüntü coyene xanepana exana. ²³Barabü naajüntücoyenesü exainchi xua jopa junuwiya wayabara pæbiwa tsainchi wawünae ewatsiwa. Baxua exanaponaeinchi tsipei bara yaputainchi xua Nacom bara exanaena pocotsiwa bayatha yabara naca tsiwünae muxu duta xua jopa yabara ainya ünhtütontsi. ²⁴Barabü yabara nanta xeinaeinchi po coyenewa xua nantiya nacui tsacabinchi xua wanayawenaewatsi. Bapoxonae nantiya naantobe tsainchi, matautano xua xanepanaya beta nantiya nata exanaeinchi. ²⁵Jopa bewa bara jüta coyeneya ichiya exanaetsi be pocotsimonae waxainchi jiwanatsi pomonae jopa pateibiyo poxonae nacaetuteibatsi xua poxonae Nacom wawünae jainchinexa. Ichitha jame bewa nantiya najüntü coyene tsacabichi xua jüntema wajinompaewatsi. Barapo coyene bewa exanaponaetsi beyacaincha xua po cui coyene copiya bayatha. Baxua exanatsi tsipei anoxuae yaputainchi xua matabi jopaena, po mataqueitha pon jiwü Pecanamataxeinaein patopaetsica.

²⁶Tsipei icha ichamonae waxainchi jiwanatsi icha barapomonae awiya abe exanapona xua pocotsiwa peichichipaexae xua abe exana xua poxonae bequein peyaputaewatha po coyene pexainyei jume, nama icha coyenewa ajibi, xua ichün equeicha petsitupaenexa barapo peabe coyenewa. ²⁷Saya jame meisa tanacopatatsi pomonae awiya abe exanapona xua matabi cunuwa po mataqueitha poxonae Nacom yabara pæbina jiwü xua penatsicuentisawa xua abe peexanaexae. Matautano tanacopatatsi xua isoto yabara cunuwa, po isoto bichocono atou, po isototha Nacom weraweraca cana exanaena daxita pomonae pia peaitafaetabi jiwü. ²⁸Po pebin jumefeba po coyene Moisés itoroba pia peitorobi coyenewatha, xua poxonae nacueyatabe pebinbe ichacuitha poxonae acoibi poyobe baponbe yabara pæbabe: “Bapon pajume tan poxonae jumefeba”, jei, bapoxonae bapon bewa tupaena. Tsipei pomonae bapon yabara pæbatsi xua penatsicuentisawa xua abe peexanaexae, barapomonae tsita itapeinya xeinatsi xua bara bapon xainyeya abe exana. Daxota bapon bewa tupaena tsipei barapomonae jopa yabara nanta xeinaeyo xua bapon peyawenaewatsi. ²⁹Xuaje payabara nanta

xeinare: Nacom bichocono atene exana pomonaetha pomonae Pexanto tatsi itaweta. Matautano atene exana pomonaetha pomonae abe yabara paeba xua pinae Jesús pejana jopa ainya cuiyo bequein Jesús tsitupa jiwi. Jesús petsitupaexae daxota Nacom yabara tsiwuna muxu duta xua jiwi pejuntu coyene xanepana exanaenexatsi Nacom. Matautano barapomonae jopa natsicuenti tsane xua abe peexanaexae. Matautano Nacom atene exana pomonaetha pomonae Nacom pia Pejumope tunaxu tatsi tsumu jumeya baru paebatsi po pejumope jiwi yawenatsi pia peantobexaetsi. Barapomonae nama bichocono atene exanaeinchi beyacaincha xua ichamonae atene exanaeinchi pomonae jopa exanaeyo pocotsiwa Moisés itoroba. ³⁰Waxainchi yaputainchi xua Nacom bayatha jeye: “Xan tacoya exanaein pentoma xua jiwi atene tsane abe peexanaexae”, jei Nacom. Equeicha Nacom Pejume Diwesitha jeye: “Nacom yabara paebina piamonae xua penatsicuentiwa xua abe peexanaexae”, jei. ³¹Po pebin abe exana bichocono junuwa cana exanatsi poxonae Nacom yabara paebina bapon tsipei barapo pebin Nacom tsitatsi xua bapon bara penatsicuentiwa xua abe peexanaexae. Bapoxonae Nacom, pon ataya asu pepoponaein, bichocono jopa juniya atene cana exanae tsane bapontha.

³²Bara ataya payabara juntanainare po dapaetha poxonae bequein aena pajume cowuntame Nacom, xua ichitha beta paexaname. Bapoxonae awiya ichitha juntea parubenaebiyame poxonae bequein ichamonae pacata abe exana. ³³Ichamonae xua paxam jiwana pam barapomonae tsumu jumeya biatainchi xuano jiwi itutha atene exaneibatsi. Iruru ichamonaeru pomonae paxam jiwana pam barapomonae nacayabara nanta xeina xua barapara iruru atene exaneibatsi poxonae ichamonae atene exaneibatsi. ³⁴Paxam painya antobexae pacayabara nanta xeiname pomonae jiwi pecubi botha jebatsi xua painya neyawenaenexa. Bequein bara ichamonae daunweya pacata nota xua xuan daxita paxeiname, daichitha awiya cataunxuae pajuntu coyene weiweiname. Bara payaputaneme xua paxeiname itabocothaichae pocotsiwa bichocono yatsicaewa wuna beyacaincha pocotsiwa po cae pin nacuathe paxeiname. Baxua xua pocotsiwa paxeiname itabocothaichae ataya tsitecaeya paxeinaename baxua. ³⁵Jopa pana nacui barapentsinde xua payabara jume cowunta dubenanaebiyame xua painya nepaca catsinexa pocotsiwa bayatha Nacom yabara paca tsiwuna muxu duta. Tsipei wajume cowunta dubenanaebiyaexae tsane Nacom, baxua nexa Nacom pentoma naca catsibina xua bichocono nawita xua pia nacuatheicha. ³⁶Paxam panantawenoname xua ajuntuayapushya parubenaebiyama awiya xua jopa paaitaconaem bequein ichamonae pacata abe exana xua painya neexanaenexa pocotsiwa Nacom ichichipa. Bapoxonae Nacom paca catsibina pocotsiwa xua bayatha yabara paca tsiwuna muxu duta. ³⁷Nacom Pejume Diwesitha jeye:

“Methaunxuae patopaetsica, pon
bewa patopeicaena.
Jopa bayathiyo tsane.

³⁸ Pon bara netsita pejuntũ coyene
xanepanaein, bapon bara ataya poponaena
tana nejume cowũta ducuaenaebiyaexae.
Ichitha icha bapon equeicha caewa jopa
nejume cowũtsiyo jopa xanepanaya beyabara
juntũ coyene weiweinaeinyo, pocotsiwa
bapon peexanaexae”, jei Nacom.

³⁹ Ichitha nama waxainchi jopa be barapomonaetsi, pocotsimona
equeicha caewa jopa jume cowũtsiyo Nacom. Barapomona Nacom
weraweraca exanaena. Nama waxainchi pomonaetsi awiya jume cowũta
dubenaenaebiyatsi Nacom beya poxonae wajuntũ coyenewa nacata
capanepa exanaeinchi.

Meje yabara xua Nacom pejume cowũtsiwatsi

11 ¹ Pon jume cowũta ducuaenaebiya Nacom, bapon bara xaniwaicha
yaputane xua xeinaena pocotsiwa wũnae ewata. Mataũtano
pejuntũ coyene tsita najume itapeinya xeinatsi xua barapara xainyei po
coyene xua barapon yabara jume cowũta bequein cataunxuae yatsicaewa
jopa taeyo. ² Wamo susato jiwi xanepanaya beta yabara paebatsi xua
Nacom beta yabara paeba ayapusũya pejume cowũtsiwaxaetsi.

³ Waxainchi wayabara jume cowũtsixae xua Nacom naca yawenapaeba
daxota yaputainchi xua barapo cae pin nacue irũ barapo itaboco
susato forotatsi, Nacom peitorobixae. Pocotsiwan xua anoxuae tainchi,
Nacom forota pocotsiwan weya xua bapana jopa taetsi, pocotsiwan xua
peinyaxae.

⁴ Abel pon caena bayatha popona yabara jume cowũta xua Nacom
yawenapaeba. Daxota bapon duwein bexuba xua tuxusi exana Nacom
nexa. Nacom tsita xanepanatsi pocotsiwa Abel exana. Daxota Nacom
yabara paeba xua bara bapon pon pejuntũ coyene wũnaein. Irũrũ Caín
Abel pentapin tatsi, bapon irũrũ bequein pexaewa exana po coyene
xua Nacom pecatsiwatsi. Daichitha barapo coyene Nacom jopa tsita
xanepanaetsi. Nacom bichocono beita cui jichatsi pocotsiwa Abel exana,
beyacaincha xua pocotsiwa Caín exana. Nacom baxua beita cui jichatsi
tsipei Abel peyabara jume cowũtsixae pocotsiwa Nacom exanapaeba.
Bequein Abel bayatha tũpa ichitha naca itacũpa xua awiya wayabara
nacidubaponaewatsi pocotsiwa Nacom exanapaeba poxonae yabara
yorobatsi Abel pia pejume cowũtsiwa tatsi.

⁵ Enoc pon caena bayatha popona yabara jume cowũta xua Nacom
yawenapaeba. Daxota bapon Enoc pichicatsi. Nacom pichica xua bapon

pecapanaenexatsi itabocothēicha, xua bapon Enoc jopa petūpaenexa bara po cae pin nacuathe. Enoc piamonae jopa caxinaetsi, poxoru Nacom pichica. Nacom Pejume Diwesitha paeba xua poxonae pewūnaeya tsane xua pichicaeinchi Enoc, Nacom tsita xanepanatsi pocotsiwa Enoc peexanaexae. ⁶Jopa itacūpaetsi xua jiwi Nacom tsita xanepanatsi icha barapo jiwi jopa beta jume cowūntsiyo Nacom. Pon xua ichichipa imoxoyo itiya popona Nacomtha jame bewa matha yabara jume cowūntsina xua Nacom bara xaniwaicha popona. Mataūtano jame bewa yabara jume cowūntsina xua Nacom bara cata pocotsiwa bayatha yabara tsiwūnae muxu duta pomonaetha pomonae pia pejeichiwichi xua pejume cowūntsinexatsi. Barapomonae Nacom yaputainchi.

⁷Noé pon caena bayatha popona yabara jume cowūnta xua Nacom yawenapaeba. Daxota Noé piamonae tsiexana pin jera nae xua piamonae matabūxūyo pebarū nacapanepaenexa. Nacom Noé pewūnaeya yabara muxuwetatsi xua pocotsiwa bexa exanaena pocotsiwa Noé bapana bayatha jopa taeyo, xua pin awūbo tsane xua Nacom itorobina. Noé bara jume cowūntsiya exana pocotsiwa Nacom itoroba poxonae pin jera nae exana xua piamonae matabūxūyo pebarū nacapanepaenexa. Noé pejume cowūntsixae Nacom, bapon tsita itapeinya xeina xua pomonae barapo cae pin nacuepiwi apara abe exana poxonae jopa yabara jume cowūntsiyo xua Nacom itorobapaeba pin awūbo. Nacom tsitatsi xua barapo jiwi atene tsane penatsicuentiswaxae jopa pejume cowūntsixaetsi. Jame Noé Nacom jūntū tsita coyene xanepanatsi pejume cowūntsixaetsi bapon. Daxota Nacom Noé piamonae matabūxūyo barū capanepatsi.

⁸Abraham pon caena bayatha popona yabara jume cowūnta xua Nacom yawenapaeba. Daxota poxonae Nacom pewabixae, bapon bara exana pocotsiwa Nacom itoroba. Bapon Abraham pia nacua weya pona xua peponaenexa icha nacuathe, po nacua bayatha Nacom yabara tsiwūnae muxu duta, xua bapon catapaebatsi. Bapon Abraham pia ira weya pona xua icha nacua beya pona po nacua bequein jopa yaputaeyo ichaxota pona. ⁹Abraham peyabara jume cowūntsixae Nacom, bapon popona po iratha xua bayatha Nacom yabara tsiwūnae muxu duta. Bapon Abraham be pon penanapaincha poponaein xua icha nacua werena poponaexae xua poxonae icha nacuathe popona. Bapon Abraham poponeiba anserabocon bomūxūxitha icha Isaac ichi irū icha Jacob ichi poxonae poponeibabe anserabocon bomūxūxitha. Abraham, irū Isaac, irū Jacob barapoyobe Nacom tsiwūnae yabara muxu duta barapo ira xua Nacom pecatsinexa. ¹⁰Abraham nacui yabara wūnae ewata xua patopaena po tomaratha ichaxota xua pepu umenae bon xua Nacom pia nacuatheicha. Apara Nacom bapon pon yabara nanta xeina xua forotsina barapo tomara po tomara xua Nacom pia coya bara exana.

¹¹Barichi Sara Abraham piseuri tatsi yabara jume cowūnta xua Nacom yawenapaeba. Bequein bapowa acue xua jopa peitacūpaewatsi

xua pexeinaewa pexui awiya jume cowunta Nacom. Sara pejume cowuntsixae, Nacom cata barapowa catatsi peajuntuyarusuwa, xua barapowa pepabetsinexa pexuyo. Baxua barapowa taexanatsi tsipei barapowa jume cowunta pocotsiwa Nacom taexanaena bapowatha xua bayatha Nacom yabara tsiwuna muxu duta. ¹²Bara barichi Abraham. Bapon bichocono amo tsecae xua bara imoxoyo petupaewaba tsane xua jopa itacupaetsi xua peexanaewa pexui. Daichitha Nacom copata xua bapon pexanto xeina xua daxota bapoxonae bapon pia pemomoxi jiwi tatsi bichocono pinmonae naenaexanapona. Barapo bicheito bichocono pinmonae icha opiteimonae ichi xua bichocono nawita. Matautano barapomonae icha taetowa beno ichi xua bichocono beno cuscjei xua mar mene itapatha. Jopa itacupaetsi xua barapo jiwi peununaewatsi icha taetowa beno ichi.

¹³Daxita pomonae jume cowunta Nacom barapomonae yajume cowuntsiya werapa. Aba cataunxuae jopa catsibichi pocotsiwa bayatha Nacom yabara tsiwuna muxu duta xua pocotsiwa bapomonae catsibapaebatsi. Daichitha barapomonae yabara jume cowunta xua pocotsiwan bexa xeinaena xua Nacom bexa catsibina. Barapomonae baxuan yabara jume cowuntsiya tsita xanepanatsi. Barapomonae nantiya nayabara nanta xeina, jeye: “Waxainchi pomonae be wananapaincha jinompaewichi barapo pena nacuathe xua be icha nacua werena waponae wi, pomonaetsi xua awiya jeita dubenanaebiyatsi po nacua yatsicaewa pepa wanacua”, jei daxita barapomonae. ¹⁴Tsipei barapomonae baxua paeba, naca yaputane exana xua awiya jeitapona po nacua yatsicaewa pia nacua tatsi. ¹⁵Barapomonae jopa apara yabara caunutsiyo ichaxota copiya po nacua weya Abraham pona. Icha metha baxua yabara paebichipa metha bara itacupaetsipatsi xua caewa pewarapaewa pia nacuathe ichaxota copiya bayatha jinompa. ¹⁶Ichitha barapomonae ichichipa po nacua xua bichocono wuna beyacaincha xua icha nacuan. Baraxua xua po nacua ichichipa, apara Nacom pia nacua tatsi. Daxota Nacom jopa auriyo xua barapomonae yabara paebatsi xua pinae Nacom barapomonae pia Nacom tatsi. Daxota Nacom barapomonae tsiwunaetatsi tomara.

¹⁷Nacom Abraham juntu coyene jujutatsi peyaputaenexa icha bara metha yatsicaya jume cowuntatsi. Daxota Nacom Abraham itorobatsi xua pexanto pebexubiwa tsane icha be pocotsi coyeneya ichi xua poxonae duwein bexuba Nacom nexa. Abraham pejume cowuntsixae Nacom daxota pexanto capana atororo beya pon yatsicaewa compa tatsi pon pewun Isaac. Abraham muxu pexanto pebexubi icha be pocotsi coyeneya ichi xua poxonae duwein bexuba Nacom nexa. Bapon baxua exana bequein Nacom yabara tsiwuna muxu duta barapo Abraham pexanto tatsi, jeye: ¹⁸“Barapo nexanto Isaacxae nantautsiname nemomoxi susato

jiwi”, jei Nacom. ¹⁹Abraham jume cowunta xua icha Isaac tupaetsipa Nacom itacupatsi xua equeicha Isaac caewa asu exanatsi poxonae bequein pexanto bexubichipa. Poxonae Abraham muxu pexanto pebexubi, apara bara be xua bayatha tupa, matautano apara be xua Abraham pexanto equeicha caewa asu taexainchi.

²⁰Barichi Isaac yabara jume cowunta xua Nacom yawenapaeba. Daxota bapon Isaac pexantobe tsipaeba, jeye: “Barabu Nacom paca yawenaena pia paca necaantobexaebe”, jei Isaac pexantobetha, Jacob iru Esaú.

²¹Barichi Jacob yabara jume cowunta xua Nacom yawenapaeba. Daxota poxonae bapon juntucuru imoxoyo tupaenaba barompaya tsipaebabe José pia pexantobetha tatsi xua pia pemomobexae tatsi. Bapon jeye: “Barabu Nacom paca yawenaenabe pia paca necaantobexaebe”, jei Jacob José pia pexantobetha tatsi. Bapoxonae bapon Nacom wuna jaintatsi poxonae naewatha nabuxu babatanotsiya yuyutanota tsipei bichocono amo tsecae.

²²Iru José yabara jume cowunta xua Nacom yawenapaeba. Daxota poxonae bara imoxoyo tupaenaba yabara paeba israelmonae. José yabara paeba xua bexa tsane Israel pia pemomoxi susato jiwi tatsi warapaena Egipto nacua weya, xua po nacuatha beya po nacua bayatha Nacom yabara tsiwuna muxu duta xua Nacom catapaeba. Matautano José pia pexui cui itoroba, xua José pia pexui piwa capanaeinchi Egipto nacua weya po nacua beya ichaxota israelmonae warapaena po nacua xua Nacom yabara tsiwuna muxu duta xua Nacom catapaeba.

²³Moisés pena tatsi iru paxa tatsi yabara jume cowunta xua Nacom yawenapaeba. Daxota Moisés matsiyatatsi botha acoibi po xometobe poxonae aena naexana. Moisés pena yabara nanta xeinatsi yawa paxa yabara nanta xeinatsi xua Moisés itubun tsecae. Baponbe jopa yabara jume cuitaya junuwiyobe xua po coyene cui itoroba Faraón pon Egipto nacuapiwi itorobiya pia pepa peewatsinchi xua pinae daxita pexui pebin wutixi bewa jutebinchi.

²⁴Iru Moisés yabara jume cowunta xua Nacom yawenapaeba. Daxota poxonae bayatha pinyoba Moisés jume aichaxaibiyi naitemata, jeye: “Xan barapowa jopa pexanton tatsin powa Faraón pexantiyo tatsi”, jei Moisés. ²⁵Saya jame bapon Moisés itapetatsi xua iru yawa muxuna atene exanaeinchi Nacom piamonae tatsi xua poxonae barapomonae atene exanaeinchi xua ichamonae atene exanaena pomonae Egipto nacuamonaexae. Moisés ichichipa xua pecana exanaewa tsainchi icha piamonae tatsi tacana ichichi. Moisés jopa benaexanaeyo xua daxitan pexeinaewa tsane pecoutha pocotsiwan xua Faraón xeina. Icha baxuan xeinaetsipa Moisés juntu coyene weiweina exanaetsipatsi barapo nacuatha xua saya caepatiyo nexa tsipae po coyene xua jiwi weiweina exanatsi xua abe peexanaponaewa. Moisés piamonae jopa benaitematsiyoy daxota jopa benotsiyoy Faraón pecopiniwa tatsi. ²⁶Ichamonae Moisés

tsũmũ jumetha biatainchi xua ajũntũcoyenetane exanatsi icha Mesías ichichi pon Nacom itoroba. Poxonae Moisés nayabara jume tane baxua tsita coyene xanepanatsi, beyacaincha xua poxonae barapo copei pexeinaewa tsane Egipto nacuatha. Baxua Moisés itapeta tsipei ichichipa xua pexeinaewa po pentoma bexa tsane Nacom catsina bapontha peatenexae po pentoma bayatha Nacom yabara tsiwũnae muxu duta.

²⁷Moisés yabara jume cowũnta xua Nacom Moisés yawenapaebatsi. Daxota najũntũ coyene weta xua pewarapaewa tsane Egipto nacua weya. Moisés jopa junuwiyo bequein yaputane xua Faraón bara casebina. Bapon Moisés bara saya amsiya pona bara be xaniwaicha tane Nacom xua be yatsicaewa barũ poinchi pon peinya peponaein xua jiwi jopa itacũpaetsi xua petaewa. ²⁸Moisés pejume cowũntsixae Nacom, piamonae cui itoroba xua peexanaenexa penabanaewa xua Pascua wũn matakabi nexa. Matautano bapon cui itoroba piamonae xua pejanantha pecapibinexa daxita bomũxũ pecoibotontha. Barapo Moisés piamonae tatsi pomonae Israel pia pemomoxi susato jiwixae tatsi baxuan exana xua daxota matatsunpin jopa tũpa exanaeyo piamonae. Barapo matatsunpin merawi patopaena xua pejutebiwa tsane matapin jiwi pomonae pia bontha jopa xeinaeinyo po jana xua Moisés cui itoroba xua jiwi bomũxũ pecoibotontha pecapibiwa tsane.

²⁹Barapo Israel pia pemomoxi susato jiwi tatsi yabara jume cowũnta xua Nacom yawenapaeba. Daxota Mar Rojo mene mentha icha muxunene beya panenebiya xua epatauta iya pona be poxonae xua ira tsewa iya peponaewa. Ichitha poxonae Egipto nacuamonae baraxoya iyiya daxita bunothopa.

³⁰Israel pia pemomoxi susatopiwi tatsi yabara jume cowũnta xua Nacom yawenapaeba. Daxota matawacaicha tocuecueniya enaponeiba pemũxũburũ iya siete po matakabibe xua barapo Jericó tomara peyacaincha toxorotsi dutsiwa xua be iboton. Barapoxonae barapo Jericó tomara peyatoxorotsiya yacaincha dutsiwa baxua iratha jopiya. ³¹Bayatha yabũyo powa Jericó tomarapiwayo Rahab yabara jume cowũnta Nacom pon Israel pia pemomoxi susato jiwi tatsi pia Nacom tatsi. Daxota bapowa jopa barũ tũpaeyo piamonae xua pia tomarapiwixae poxonae tomarapiwi werapa jopa pejume cowũntsixae Nacom pon Israel pia pemomoxi susato jiwi tatsi pia Nacom tatsi. Bapowa Rahab powa copiya bayatha pesi cui weiweinaewa pebiwitha. Poxonae Israel pia pemomoxi jiwanamonae namicha pata xua pecui amanayabiya taenexa Jericó tomaratha, bapoxonae barapowa Rahab matenta weyataeya waba, xua barapo israelmonae jiwanamonae wabatsi pia botha tatsi.

³²Jopa equeicha paebinyo xua equeicha pinmonae tayabara paebiwa pomonae pejume cowũntsiwi Nacom. Jopa neyapu jũpaeyo xua jopa taxeinaewa matakabi xua tacueicueijeinexa Gedeón yabara, irũno Barac

yabara, iruno Sansón yabara, iruno Jefté yabara, iruno David yabara, iruno xua Samuel yabara, iruno pomonae Nacom pia peitorobi jume petapaebiwi tatsi yabara. ³³Daxita barapomonae jume cowũnta Nacom. Ichamonae barapomonae jiwana, amanayaba ainya nacuanpiwitha, pejume cowũntsixae xua Nacom yawenaena. Ichamonae pejume cowũntsixae Nacom daxota jiwitha beta xaniwaicha canamata itoroba. Ichamonae pejume cowũntsixae Nacom barapomonae catsibatsi pocotsiwan xua bayatha Nacom yabara tsiwũnae muxu duta. Ichamonae pejume cowũntsixae Nacom, Nacom exana xua coibo acaba neũthũn, xua barapomonae jopa atene peexanaenexatsi barapo neũthũn. ³⁴Mataũtano ichamonae pejume cowũntsixae, daxota Nacom yawena barapomonae poxonae Nacom itaxutaba exana po isoto bichocono pin isoto xua barapomonae po isototha tautatsi. Barichi ichamonae pejume cowũntsixae daxota Nacom capanenebiya tsaibi barapomonae poxonae muxu pejutebeibichi peopi sojeiwantha xua be cusi. Mataũtano pomonae faefaena, equeicha Nacom daunwei exana. Daxota barapomonae daunwei poxonae naba. Ichamonae Nacom peyawenaexae amanayaba pia peitaftaetabi jiwichi xua ainya soldadomonaein bicheitontha. ³⁵Barichi ichamonae yabũxi pejume cowũntsixae equeicha caewa piamonae xeina, pomonae equeicha caewa taasutsi petũpaewa weya.

Ichamonae itacũpatsi xua panenebiya xua jopa werapae tsane xua icha poxonae Nacom itawetatsina. Nama barapomonae jopa bepaebiyo baxua daxota barapomonae werapa poxonae bichocono caitacueintatsi ichamonae. Barapomonae, pomonae pewerapaewi yaputane xua pejume cowũntsixae Nacom, daxota Nacom equeicha asũ exanaena xua barapomonae pepatsiwa tsane Nacom pia nacuatheicha. ³⁶Ichamonae pejume cowũntsixae Nacom, bichocono ajũntũcuicoyenetane tsipei bichocono cui capanebatsi ichamonae. Mataũtano ichamonaerũ cuaintebatsi. Ichamonaerũ penain mutontha cubebatsi. Ichamonaerũ jiwĩ pecũbi bontha cuaranobatsi. ³⁷Ichamonae pejume cowũntsixae Nacom, ibotontha tũpa exanatsi poxonae cuinbabatsi. Mataũtano ichamonae werapa poxonae epa nantarabobiya thabebatsi seruchotha. Irũrũ ichamonae pejume cowũntsixae jutebatsi peopi sojeiwantha xua cusin. Ichamonaerũ pejume cowũntsixae Nacom, taseicatsi pexaewa, yawa taseicatsi bon, xua daxota saya dubenanaebiya, yawa naxataba oveja bocoton xuano xua cabra bocoton. Barapomonae acopeibiwi tsobenae, barainebatsino abe taexanebatsino. ³⁸Pomonae barapo cae pin nacuathepiwi Nacom pejume cowũntsiwi yabara paebatsi, yabara jeichiche: “Jopa be cui copatichi xua barapomonae pejinompawea tsane watomaratha”, yabara jeichichi. Ichitha barapomonae Nacom tsita ainya cuichi beyacaincha barapomonae pomonae barapo cae pin nacuathepiwixae. Barapo Nacom pejume cowũntsiwi dubenanaebiya

ichaxota ira xuepana susato tsurucuae nacuatha. Matautano barapomonaē demxuwantha dubenanaebiya, mūthūnthano jinompa, xuano xua duwei pia mūthūnthā jinompano.

³⁹Bequein Nacom yabara paeba barapomonaē xua beta peexanaexae pejume cowūntsixaetsi, daichitha cataunxuae abū barapomonaē jopa catsibichi pocotsiwa Nacom bayatha yabara tsiwūnae muxu duta barapomonaē, matautano xua caeinthano. ⁴⁰Barapomonaē cataunxuae abū jopa catsibichi baxua tsipei Nacom naca yabara nanta xeina xua bexa tsane irū naca catsibina pocotsiwa bapon tsita xanepanatsi. Pocotsiwa bapon catsibina xua apara barapomonaē Nacom naca cayawa muxuna jūntū coyene xanepana exanaena.

**Meje yabara xua waxainchi bewa exanaponaetsi
icha Jesús ichi poxonaē exanapona**

12 ¹Pomonaē xuaunxuae yabara pacata tinatsi barapomonaē bichocono pin bicheitomonaē, pomonaē pejume cowūntsiwi po coyene xua Nacom yawenapaeba. Barapomonaē naca tsita itapeinya xeina xua awiya xanepanaya jume cowūnta dubenanaebiya bequein atene exanatsi ichamonaē. Baxua naca cuiduba xua irū bewa xanepanaya jume cowūnta dubenanaebiyaeinchi bequein naca atene exana ichamonaē. Barabū waxainchi daxita nacui barapentinchi abe waexanae cuiru coyenein pocotsi coyenein xua jopa naca yawenaeyo xua Nacom beta wataexanaewatsi. Barabū waxainchi beitemaya ajūntusūya awiya exanapoinchi pocotsiwa Nacom naca cui itoroba. ²Saya meisa Jesús jūntanainaeya jinompatsi wanaca yawenaenexa. Bapon copiya bichocono pejume cowūntsixae Nacom daxota bapon wanaca canamataxeinaein xua wajume cowūntsinexa. Matautano bapon betiya naca exana xua beta wajume cowūntsiwa poxonaē cataunxuae awiya wajinompawea barapo cae pin nacuathe. Jesús bara saya copata xua atene exanadutatsi naetotha ichamonaē poxonaē tūpa exanatsi. Bapon jopa auriyo bequein naetotha tūpa exanatsi jiwi peitūtha tatsi. Ichamonaē ba bichocono aura xua poxonaē petūpae exanaewatsi naetotha. Nama bapon Jesús jopa auriyo poxoru nayabara yaputane xua pirapae poxonaē nacana cui wetinchi xua atene exanatsi, xuano xua poxonaē tūpa exanatsi naetotha, bapoxonaē bichocono jūntū coyene weiweinaena. Anoxuae bapon Jesús eca pia pexeinya peecaethopeibiwatha xua Nacom pia pecoxa weya tatsi xua itabocothaicha ichaxota Nacom eca pia pexeinya peecaethopeibiwatha.

³Jesús pacayabara jūntanainaponde xua bayatha po coyene Jesús abeya exanatsi pomonaē abe peexanae jiwi. Jesús awiya beitemaya saya popona poxonaē bequein bichocono atene exanatsi barapomonaē pomonaē abe peexanaewi. Daxota jopa paraichinde xua poxonaē jopa pana najūntū coyene tsacabim. Matautano jopa paajūntūcoyenefaetabinde

xua poxonae daxota jopa beta painya taexanaewa Nacom. ⁴Painya jüntu coyenewatha pajume torobabame abe peexanae cuiru coyenein xua painya neexanaeyainwa barapo coyenein. Bapoxonae jopa panaitematsim xua painya nejume cowuntsiwa Nacom. Bequein bara baxua daunwei paexaname ichitha awiya cataunxuae jopa pawerapaem xua barapo coyene painya neexanaexae icha bayatha Cristo ichi xua tupa xua bichocono daunweya peexanaexae barapo coyene. ⁵Paxam pajüntemainame xua bayatha Nacom paca muxuweta xua paxam bara Nacom pia pexui tatsi pam. Baxua yabara Nacom Pejume Diwesitha paca jeye:

“Tapexui pam, jopa amsiya payabara nanta xeinaeinde pocotsiwa yabara paca muxuwetatsi tapaca cuidubinexatsi.

Poxonae atene paca exanatsi jopa ajüntucoyenefaetabiya pajinompaeinde xua yabara tapana nejume cowuntsiwam.

⁶Tsipei muxuwetsiya cuiduban pomonaetha pomonae antobein.

Matautano atene exananno pomonaetha pomonae tapexui tsicotan”, jei Nacom Pejume Diwesitha.

⁷Awiya jüntema pajinompare poxonae bequein Nacom paca atene exana xua paca necacuidubixae. Baxua Nacom pacata exana tsipei paca nacana exana pia pexui tatsi pam. Dapo pexuyo ajibi, po pexuyo jopa paxa muxuwetsiya cuidubichi xua poxonae icha bichocono antobetsi paxa. ⁸Nacom pia pexui muxuwetsiya cuiduba. Icha Nacom jopa paca muxuwetsiya cuidubichipae, bapoxonae paxam jopa Nacom pia pexui tatsi pam tsipae. Saya be catsa pexui pam tsipae icha be pocotsi pexui ichi po pexui seicaya icha paxa barompa. ⁹Matautano caena bayatha poxonae cataunxuae pexuichi waxeiwi naca atene exana wanaca muxuwetsiya cuidubixae. Daichitha waxeiwi baru cui itura jinatsi. Waxainchi bewa ichichipaetsi xua waexanaewatsi pocotsiwa naca cui itoroba pon Waxa Nacom, pon itabocothaicha popona. Barapocotsiwa bewa exanaeinchi beyacaincha pocotsiwa exanatsi xua poxonae waxeiwi naca cui itoroba poxonae jinompatsi barapo cae pin nacuathe. Baxua bewa exanaeinchi Waxa Nacom pon itabocothaicha popona wanaca catsinexa peajüntuyapusu coyenewa. ¹⁰Waxeiwi poxonae pexuichi barapo cae pin nacuathe saya caepatiyo naca muxuwetsiya cuiduba. Baxua nacata exana icha be pocotsi coyeneya xua ichichipa xua tsita xanepanatsi. Ichitha nama Nacom naca muxuwetsiya cuiduba wanaca yawenaewa tsane. Matautano baxua nacata exana xua wanaca cana exanaewa tsane xua bichocono wajüntu coyene xanepanaewichi, icha Nacom ichi xua bichocono pejüntu coyene xanepanaein. ¹¹Poxonae

naca atene exana bara bapoxonae nanta xeinatsi xua jopa nacata xaexaenaecaeyo, tsipei bara xaniwaicha naca atene exana. Ichamonae yabara cui copaba xua bara nacuiduba xua poxonae bequein Nacom atene exana, pemuxuwetsiya cuidubixae. Barapomonae jame jopa natsicuentzi tsane xua abe peexanaexae bapontha. Barapomonae xeinaena pejuntũ coyene xanepanaewa Nacomtha xuano jũntema dubenanaebiyaena.

**Meje yabara xua poxonae Nacom naca muxuweta
xua jopa bewa Nacom itawetichi**

¹²Yaitama pajuntũ coyene faefaename, xua painya nejume cowũntsiwa daxota painya coutha pana najuntũ coyene tsacabare xua beta painya nejume cowũntsiwa tsane Nacom. Mataũtano xua payabara ajuntũcoyenerewem tsaibi ichawan. Pana najuntũ coyene itorobare xua awiya ayapusũya painya neexanaponaewa tsane. ¹³Painya xoba icha diwesi pajume cowũntame po diwesi xua jopa Nacom Pejume Diwesi tatsi. Ɔ meisa paexanare pocotsiwa Nacom Pejume Diwesitha yabara paeba xua beta painya nejume cowũntsiwa. Icha baxua paexanaetsipame irũ ichamonae barichipae. Bequein barapomonae copiya jũntũ coyene faefaenaetsipa pejume cowũntsiwatha ichitha bapoxonae beta exanaponaetsipa xua pejume cowũntsiwa pia paca cui taexae.

¹⁴Nantiya daxita jiwi ajuntũyapusũya betiya pana nabarũ jũntemiya jinompare. Bichocono pana najuntũ coyene xanepana exande Nacomtha xua jopa painya nenatsicuentzinexa xua abe painya neexanaexae bapontha, xua painya netaenexa bapon. Tsipei pomonae jopa xeinaeyo barapo coyene jopa itacũpaetsi xua Nacom petaewatsi tsainchi. ¹⁵Dota pam xua ichamonae pomonae paxam jiwana pam pia xoba jopa ichipaeoyo po coyenewa Nacom yawena barapomonaetha pia peantobewaxae. Mataũtano barapo ichamonae pomonae painyamonae jiwanaxae pia xoba abe exana ichamonae peitũtha tatsi xua daxota irũ ichamonae pebarichinexa xua abe peexanaewa. ¹⁶Ichamonae pomonae paxam jiwana pam, pia xoba nota icha yabũxitha, powaxi jopa xapain barompaya pia seurixi. Mataũtano dota pam xua ichamonae paxam jiwana pam jopa tsita pecui pawĩ tsainchi po coyenewan xua Nacom piawan tatsi. Barapo coyene Esaũ exana pon caena bayatha tũpa. Bapon Esaũ jopa tsita ainya jume cuiyotsi pocotsiwa bayatha Nacom yabara tsiwũnae muxu duta xua bepa pinae Nacom Esaũ yaweneibichi. Barapon Esaũ piyainxae peyapintha Jacobtha cata po coyene xua pia coya pecanamataxeinae coyenewa po coyene matapin ba xeina. Tsipei Esaũ jopa jume cowũntsiyo Nacom daxota nata caenaeta barapo coyenewa xua nata matomata pexaewa xua saya cae penabanaewiyo. ¹⁷Paxam payaputaneme xua bapon Esaũ pirapaeyo ichichipa xua equeicha caewa pexeinaewa tsane xua po coyene peainya cui coyene po coyene matapin ba xeinaena xua

paxa catatsi. Barapo coyene po coyene xua coxiyũn tawũca pexanto pon matapin xua Nacom peyawenaewa tsane. Ichitha bapon Esaú peyapin cata barapo coyene xua matomata pũpara. Bequein bara bapon auranaya caunutsiya wecoyeya paeba, ichitha jopa itacũpaetsi xua caewa xeinaena barapo coyene po coyene xua ba matapin xeina.

¹⁸Caena bayatha pia Nacom caquita ponaetsi Israel pia pemomoxi susato jiwi tatsi demxuwa itabaratha umena poxonae Nacom Moisés catatsi pia peitorobi coyenewa. Barapomonae jume tane pocotsiwa Nacom paeba yawa tane demxuwa. Ichitha nama paxam jopa beparaichim. Jopa panantawenonaem xua paumenaename demxuwa itabaratha xua painya necaquita ponaenexa Nacom. Poxonae Israel pia pemomoxi susato jiwi tatsi umena barapo demxuwa itabaratha, baxoyo pin isoto uncueica barapo demxuwatha. Mataũtano bapoxonae bichocono quirei, yawano nobonno. Mataũtano pin joibo baxoyo uncueica. Ichitha jopa bara paichim, jopa pataem baxuan. ¹⁹Paxam jopa pajume taem peobiwa jume po peobiwa pewũn trompeta nain matawũn, icha poxonae barapo Israel pia pemomoxi susato jiwi tatsi ichi xua jume tane barapo trompeta jume. Paxam jopa pajume taem Nacom pejume poxonae Nacom cueicueijeĩ barapo Israel pia pemomoxi susato jiwitha tatsi barapo demxuwatha. Pomonae jume tane barapo jume, barapo israelmonaexae Moisés jume itorobatsi xua bepa pinae Nacom equeicha jopa pepaebiwa tsane.

²⁰Barapomonae baxua Nacom jume matawentatsi tsipei bichocono pijunuwi xua pocotsiwa Nacom itorobina. Poxonae itoroba Nacom jeye: “Pon nataxuna jayata barapo demxuwa bewa bapon pabexubim ibotontha. Jopa ainya cuiyo bequein icha metha duwein tsipae, xuano icha metha bequein jiton tsipae”, jei Nacom. ²¹Barapomonae bichocono junuwa pocotsiwa xua tane barapo demxuwatha irũ Moisés bichocono junuwa. Daxota paeba, jeye: “Bichocono tajunuwi jijiyã”, jei Moisés.

²²Jame anoxuae painya nejume cowũntsixae Nacom, bapon paca yabara cui copata xua painya nepatsiwa tsane bapon pia tomaratha tatsi, po tomara pewũn Jerusalén tomara. Barapo tomara eca ichaxota po demxuwa pewũn Sión. Barapo tomara Nacom pia tomara tatsi pon ataya tsitecaeya asũya pepoponaein. Barapo tomara xua pepa Jerusalén tomara Nacom pia nacuatheicha tatsi eca. Mataũtano papatsiname baxoteicha ichaxota jinompa ayeimonae matatsunpiwi, xua weiweinaeya nanacaetutsina xua pia nanabarũ wũnae jainchinexa Nacom. ²³Mataũtano pajume cowũntame Jesús xua painya nepatsinexa ichaxota Nacom piamonae tatsi nacaetuta pomonae Nacom pia diborotha wũn dubena xua itabocotha. Barichi papatsiname Nacomtha, pon yabara paebina daxita jiwi xua penatsicuentiwa xua abe peexanaexae. Mataũtano papatsiname ichaxota jiwi pia jumopein tũnaxũ tatsi jinompa pomonae xua beta exana xuano xua Nacom beta cana jũntũ coyene

wetsiya xanepanaya exana. ²⁴Matauta papatsiname ichaxota Jesús popona pon jiwi peyabara jume yawenaen Nacomtha xua jiwi pepatsiwa tsane Nacomtheicha. Matautano bapon nacata catsica Nacom pia pena peyabara tsiwunae muxu dutsiwa tatsi. Bapon pia pejana tatsi xua barapo jana pepichapabarenaexae Nacom naca yabara juntu coyene juntemaina abe waexanae cuiru coyenein. Barapon pia pejana tatsi jiwi beta cana exanatsi beyacaincha Abel pia pejana tatsi. Tsipei poxonae bapon bexotsi, jopa nantawenonaeyo xua bapon peyantomatsiwatsi. Ichitha poxonae Abel bexotsi, nantawenona xua peyantomatsiwatsi.

²⁵Dota pam. Jopa bewa pajume itawetsim Cristo pon wanaca tsipaebixae Nacom yabara. Pomonae bayatha Nacom jume itawetatsi poxonae bequein Moisés muxuweta jiwi barapo irathe Nacom nexa, barapomonae jopa Nacom capanenebiyaeyo xua atene abe pia peexanaexae. Waxainchi jopa naca itacupaeyo xua panenebiyatsi xua atenetsi abe waexanae coyenewantha icha jopa Nacom jume naitawetachi xua itaboco wetsica wanaca tsipaebiwa. Waxainchi bichocono nama atenetsi, beyacaincha barapomonae xua atene abe pia peexanae coyenewantha pomonae Moisés baru popona. ²⁶Caena bayatha Nacom tsipaeba barapo irathepiwi tsique poxonae Moisés popona, Nacom pia jumetha ira jijiyata exana. Ichitha anoxuae Nacom tsiwanaya jeye: “Abu equeicha bara caeto tsane ira jijitsin yawano itabocotheichano jijitsin”, jei Nacom. ²⁷Poxonae Nacom jei: “Abu equeicha bara caeto tsane”, jei, naca yaputane exana xua Nacom aichurucuae exanaena pocotsiwan xua barapo cae pin nacuathe xeina pocotsiwan itacupatsi xua pejijiyatsiwatsi. Saya meisa jopa aichurucuae exanae tsainchi pocotsiwan xua jopa itacupaetsi xua pejijiyatsiwatsi xua pocotsiwan Nacom piamonaetha peyabara tsiwunae muxu dutsi coyenewa. ²⁸Nacom pia nacua, ichaxota Nacom itoroba, yawano xua waxainchi baxota itorobatsi, barapo nacua jopa itacupaetsi xua jijiyatatsi xua aichurucuae peexanaenexatsi. Daxota bewa jeichichi Nacomtha: “Nacom, maisa pajuntu coyene weiweinan pebaxuaxae”, bewa jeichichi. Poxonae Nacom wunae jaintinchi waxainchi bewa yabara nanta xeinaetsi pia pejuntu coyene xanepanae coyenewa tatsi. Matautano bewa bapon cunuwiya wunae jaintichi pia peayapuswa pexeinaexae. ²⁹Wanacom weraweraca cana exana jiwi, pomonaetha pomonae jopa pejume cowuntsiwichi. Nacom baxua exanaena icha be poxonae nawa ichi xua poxonae daxita topowa poxonae taxua.

**Meje yabara xua pocotsiwa bewa exanaetsi xua
pocotsiwa Nacom tsita xanepanatsi**

13 ¹Jopa pana nacui barapentsinde xua caemonae nantiya painya nenaantobewam pomonae be painya eweicho jiwi painya

nenatsicotae jiwi pam painya nejume cowuntsixae Jesucristo. ²Jopa pajuntemainaeinde xua beta painya netaexaneibiwa tsane pomonae pateiba painya bontha pomonae iru pejume cowuntsiwi Nacom tsipei metha beya jemeicha barapomonae tsipae pomonae Nacom itoroba xua beta painya nepacata exanaenexa. Caena bayatha ichamonae pexaewa apata poxonae matha jemeicha pia botha tapatatsi, xua poxonae jopa xapain yaputaeyo xua deta cou apara matatsunpiwi.

³Payabara nantu coyene xeinare pomonae jiwi pecubi botha cuaranobebatsi painya neyawenaenexa barapomonae icha be poxonae paichim xua iru jiwi pecubi botha paca cuaranobaru. Payabara nantu coyene xeinare pomonae peraxa jubebatsi xua ichamonae exana painya neyawenaenexa barapomonae. Tsipei paxam iru jiwi pam, paca yabara itacupatsi xua ichamonae paca necaperaxa jubawi.

⁴Paxam bewa beta pananta xeinaem poxonae jitha paename xua barapo coyene paca tsita ainya cui. Daxota jopa bewa ichawa beya panasi cui weiweina exanaem poxoru painya seurixi bayatha paxeiname. Tsipei Nacom yabara paebina jiwi xua penatsicuentiwa xua abe peexanaexae pomonaetha pomonae jopa xapain exanaeyo xua be poxonae yabuxi jeita xua po coyene jiwi jopa yabara copatsiyo. Matautano barichi Nacom yabara paebina jiwi xua penatsicuentiwa xua abe peexanaexae pomonaetha pomonae nasi cui weiweina exana poxonae bequein pia seurixi xeina.

⁵Jopa bichocono paichichipaeinde paratixi. Jame maisa pajuntu coyene weiweinare painya nexeiaexae pocotsiwa Nacom paca catsiba. Baxua paexande tsipei Nacom jeye: “Bapana jopa compa capopona exanae tsainchi. Bapana jopa cacuenta ponae tsainchi”, jei Nacom. ⁶Daxota naca itacupa xua jume cowuntsiya jeichichi:

“Nacom, pon jiwi Pecanamataxeinaein,
 bapon pon xua tana neyawenaein.
 Jopa junuwinyo poxonae jiton xua
 abe tana exanaewa”, jeichichi.

⁷Payabara cui jantanainare painya nepaca canamataxeinaewi pomonae bayatha paca cuiduba Nacom Pejume Diwesi. Barapomonae pacui taema, tsipei barapomonae beta jume cowuntsiya jinompa beya poxonae barapomonae yacuiya werapa. Paxam beta pajume cowuntsiya jinompare icha barapomonae ichi xua beta jume cowuntsiya jinompa.

⁸Jesucristo saya tsitecaeya pepu jupa exanaponae. Baxua exana caena bayatha, anoxuaeno, xuano xua bara ataya tsitecaenano xua jiwi beta peyawenaewatsi. ⁹Daxota jopa pacopatsinde xua ichamonae painya nepaca cuidubiwa icha pecuidubi diwesi po diwesi pia diwesi barompa, po diwesi jopa Cristo pia diwesi tatsi. Jame ainya cui xua naajuntuyapusu exainchi Nacom pia peantobe coyenewatha. Po coyenein

xua itoroba xua penabanaewa yabara barapo coyenein jopa naca ajüntayapusu exanaeyo Nacomtha. Barapo peitorobi coyenewan bapana jopa yawenaetsi pomonae bequein xua exanapona barapo coyenewan.

¹⁰Waxainchi xeinatsi barompaya wacoyene po coyene be poxonae xua tuxusi exanatsi Nacom nexa poxonae caein naetotha naca tsitupa xua daxota Nacom jopa tsitatsi xua penatsicuentisiwa xeinatsi xua abe waexanaexae. Baxua apara xua poxonae Cristo tupa naetotha abe waexanae cuiru coyenein nexa. Po sacerdotepiwi xua nacuita Nacom pia tututha anserabocototha xua caena bayatha barapocotsi coyene jopa itacupaetsi xua pexeinaewa barapo coyene tsipei barapo sacerdotemonae cataunxuae jutebeiba duwei jiwi abe pia peexanae cuiru coyenein tatsi nexa. ¹¹Caena bayatha pon pepa sacerdotepin, duwein jana capaneiba ichaxota po tutu yatsicaewa Nacom pia tutu tatsi po tutu bichocono peainya cui tutu. Bapon baxua exana xua Nacom peyabara jüntemainenexa jiwi abe pia peexanae coyenewan tatsi. Bapoxonae barapo duwein ompin tautatsi tomara cuariya beya. ¹²Cristo barichichi. Tomara cuariya beya tupa exanadutatsi naetotha, xua daxita jiwi pejuntu coyene xanepana exanaenexa tsainchi Nacom. Cristo pejana pichapabarenaexae poxonae tupa, Nacom jopa tsitatsi xua jiwi penatsicuentisiwa xua abe peexanaexae. ¹³Ichamonae Jesús aura exanatsi poxonae tomara cuariyatha tupa exanadutatsi naetotha. Barabu copatatsi xua ichamonae iru naca aura exana wajume cowuntsixae Jesús xua daxota naca atene exana icha Jesús ichichi. ¹⁴Barapo cae pin nacuathe jopa xeinaetsi tomara, po tomara ataya tsitecaeya ayapusu tsuncuae. Jame wunaeya ewatatsi, po tomara xua bexa patopaetsica Nacom pia nacua wetsica tatsi. ¹⁵Daxota waxainchi bewa wunae jainteibichi Nacom tsipei Jesucristo naca tsitupa. Poxonae Nacom wunae jaintatsi wajumetha baxua icha be poxonae ichi poxonae duwein tautatsi poxonae tuxusi exanatsi Nacom nexa. Nacom wunae jaintatsi jeichichi: “Nacom maisa bichocono nejuntu coyene xanepanaein”, jeichichi. ¹⁶Jopa pajüntemainaeinde po coyene xua beta painya taexanaewa ichamonae. Painyawan panata jiwana wetsabare pocotsiwan xua paxename xua painya necatsibinexa pomonae xua jopa xeinaeyo. Tsipei poxonae baxua paexaname, bichocono xanepana icha be ichi poxonae paexaname poxonae duwein patautame xua patuxusi exaname Nacom nexa pocotsiwa Nacom tsita xanepanatsi.

¹⁷Paexande pocotsiwa paca cui itoroba pomonae painya nepacacanamataxeinaewi. Matautano saya barapomonaetha pajume naitaware. Pabarú cui itura jinare barapomonaetha tsipei barapomonaetha paca juntu coyene eeniya ewata. Barapomonaetha yaputane xua bexa tsane Nacom barapomonaetha yabara paebina xua penatsicuentisiwa xua abe peexanaexae icha barapomonaetha jopa beta paca juntu coyene

eeniya ewatsiyo. Bara pacopare xua barapomonaē jūntū coyene weiweina exanatsi poxonae paca jūntū coyene eeniya ewata xua jopa pejūntū coyene wecoyēinexa xua abe painya neexanaexae. Tsipei icha barapomonaē jūntū coyene wecoyēi baxua xapain jopa paca yawenaeyo.

¹⁸Nacomtha painta wūcare. Bara payaputan xua pata jūntū coyene pana netsipaeba xua pinae bara beta paexanan. Paxan paichichipan xua awiya beta pata exanaewa daxita coyenewan. ¹⁹Paca wūcatsi xua painya inta wūcaenexam tsane Nacomtha xua Nacom bara inta pecopatsinexa xua methaunxuae tapaca siwa ponaewa tsainchi equeicha.

Meje yabara xua najume wetsiya paeba pon tina

²⁰Nacom, barapon peyajūntū coyene jinaein xua jūntema pepoponaewa. Barapon Nacom Jesús caewa asū exanatsi petūpaewa weya pon Wanacanamataxeinaein. Bapon Jesucristo pon pepa Peewatsin xua daxita carepaya jīwi peewatsinchi icha be pocotsin oveja beta peewatsin ichi. Bapon Jesucristo pejana pichapabarenaexae poxonae tūpa, canacui wetsiya exana po coyene xua bayatha Nacom yabara tsiwūnaē muxu duta po coyene xua ataya tsitecaeya tsane. ²¹Barabū barapon Nacom paca jūntū coyene xanepana exanaena xua jopa painya nenatsicuentēsinexa xua abe painya neexanaexae. Mataūtano bū bara paca catsina xua daxita pocotsiwan panantawenoname xua xuan xanepanaya painya exanaenexa po coyēin Nacom ichichipa. Barichi barabū Jesucristo pia peayapusūwa naca cana exanaena xua exanaeinchi po coyene Nacom tsita xanepanatsi. iBarabū jīwi Cristo ataya wūnaē jaintinchi pexēinaexae peayapusū coyenewan! Je, bara ichi tsane.

²²Tamonae pam, pomonaē pam irū painya nejume cowūntsixae paca itorobatsi xua bepijawa jopa payabara jume cui aitaconaeinde po jumein paca muxuwetatsi, barapo tsica cartiyo po cartiyo imoxoyo jume tsecae. ²³Maisa ichichipan xua painya neyaputaewa tsane xua Timoteo bayatha copatatsi jīwi pecūbi bo weya. Barapon be wayapin watsicotaein pejume cowūntsixaerū Jesucristo. Ichaunxuae bapon taxantha patopaena bapon methaunxuae nebarū iya tsane painya xainya beya xua equeicha tapaca siwa ponaewa tsainchi.

²⁴Painta jacobare daxita pomonaē painya nepaca canamataxeinaewi. Irūno painta daxita jacobare pomonaē pejume cowūntsiwirū Jesucristo. Italia nacuamonaepiwi barapomonaē paca jacobā, pomonaē irū pejume cowūntsiwi.

²⁵Barabū Nacom daxita pam bichocono paca yawenaena pia painya nepaca caantobewaxae.